

深密解脫經序

沙門都釋曇寧造

効一

夫至迹虛微理包言像之外幽宗沖秘旨絕名相之域是以大聖秉獨悟之靈姿鏡寰中之妙趣實相廓然與虛無齊其量法性愴爾與幽冥同其源神輝潛映而不滅萬相俱應而不生然此生也生所不能生此之滅也滅所不能滅顯既非有隱豈為無寂焉而動動焉而寂出沒無方教迹星羅者矣蓋深密解脫經者乃北聖之玄源億善之淵府論其旨

也則真相不二語其教也則湛然理一義盡沖籍文窮祕典妙絕熙怡包括羣藏自非詮于理教何以顯茲深致但東西音殊理憑翻譯非翻非譯文義斯壅所以久蘊而不顯者良俟嘉運而光通矣大魏皇帝總六合以統天包百王以馭宇道邁羲唐德超古哲而每遊神覺典妙翫大乘思在翻演鴻宣遐代時有北天竺三藏法師菩提留支魏音道晞曾為此地之沙門都統也識性內融神機外朗沖文玄藏罔不該洞以永熙二年龍次星紀

月呂挺實詔命三藏於顯陽殿高陞法座披  
 匣揮塵口自翻譯義語無滯皇上尊經祇法  
 執翰輪首下筆成句文義雙顯旨包羣籍之  
 祕理合衆典之奧但萬機淵曠無容終訖捨  
 筆之後轉授沙門都法師慧光曇寧在永寧  
 上寺共律師僧辯居士李廓等傳承上軌歲  
 常翻演新經諸論津悟恒沙帝亦時紆尊儀  
 飾茲玄席同事名儒招玄大統法師僧令沙  
 門都法師僧澤律師慧顯等十有餘僧緇俗  
 誦誦法事隆盛一言三覆慕盡窮微是使深

密祕藏光宣於景運解脫妙義永流於遐劫  
 理教淵廓罔測其源旨趣中絕焉究其宗所  
 謂鹿苑之唱再興祇園之風更顯者也寧雖  
 識昧忝廁倫末敢罄庸管祇記云爾

深密解脫經卷第一

劫一

二

元魏天竺三藏法師善提留支譯

序品第一

歸命釋迦牟尼佛

如是我聞一時婆伽婆住法界殿如來境界

處衆寶赫焰一切莊嚴第一之處徧至無量  
諸世界處放大光明普照之處無量善巧差  
別住處無有分齊過分齊處過諸一切三界  
境界出世間上上善根境界成就之處善得  
清淨無礙解脫自在之處諸佛如來神力住  
持之處無量菩薩衆所行處無量諸衆天龍  
夜叉乾闥婆阿修羅迦樓羅緊那羅摩睺羅  
伽人非人等之所行處是大法界究竟滿足  
喜樂之處畢竟能與一切衆生利益之處離  
諸一切煩惱垢處離諸一切諸魔怨敵諸佛

住持之處莊嚴之處大法意者之所明處奢  
摩他毗婆舍那大乘之處入空無相無願大  
解脫樂處無量功德衆大寶蓮華王之所莊  
嚴處婆伽婆住如是等不可思議自在之處  
諸佛如來善覺所覺離於二行到無相處行  
諸佛行得諸如來第一一切平等到無障礙之所  
去處能到一切不退法輪能到不可降伏境  
界不可思議體能到一切三世平等能到一  
切諸世界身能到諸法無疑之處能到一切  
究竟智行能到法智無疑境界得諸一切無

分別身能答一切菩薩問智能到無二行之  
彼岸能到諸佛無有差別解脫智處能到無  
邊無中三昧境界廣大如法界究竟如虛空  
盡未來際與諸無量聲聞衆俱心善調伏皆  
是佛子善得心解脫善得慧解脫善得清淨  
戒求法者與樂成就多聞住持多聞具足多  
聞善思所思善說所說善作所作善得一切  
速疾般若善得一切疾去般若善得一切猛  
利般若具足三明見第一法得究竟行能作  
清淨受大施主具足成就寂靜威儀畢竟成

就忍辱柔和善受佛教能如說行時諸無量  
大菩薩衆皆從無量種種佛土而來集會是  
諸菩薩皆住一切所求大處畢竟能取無上  
大法得一切衆生平等之心離諸一切分別  
降伏一切諸魔怨敵離諸一切聲聞辟支佛  
之所念處得大法味喜樂具足過五怖畏得  
不退地一乘之體現前能滅一切衆生怖畏  
之地如是等不可說不可思不可稱不可量  
不可數菩薩衆俱  
聖者善問菩薩問品第二

爾時婆伽婆百千萬阿僧祇大衆前後圍繞  
爲諸菩薩說其深法時大衆中有聖者菩薩  
摩訶薩名曰善問在衆而坐即依無言無有  
二相第一義諦問聖者深密解脫菩薩言佛  
子言一切法不二一切法不二者何者爲一  
切法云何名不二爾時深密解脫菩薩告善  
問菩薩言善男子言一切法者有二種何等  
爲二一者有爲法二者無爲法善男子有爲  
法者非有爲非無爲無爲法者非有爲非無  
爲善問菩薩言佛子云何有爲法非有爲非

無爲云何無爲法非有爲非無爲深密解脫  
菩薩言善男子言有爲法者惟是如來名字  
說法所言如來名字說法者惟分別言語名  
爲說法善男子若惟名字分別言語名說法  
者但集種種名字言語成常不如是是故我  
說非有爲善男子言無爲者惟言語體善男  
子假使離於有爲無爲者彼法亦如是善男  
子雖無言語而不空說事佛子何者爲事而  
言不空說所謂聖人知聖人見聖智知聖智  
見無言所證爲欲說彼無言證法依相說彼

有為無為善男子言無為者惟是如來名字  
 說法名字說法者是分別相分別相者即言  
 語相善男子言語相者即是名字之所集法  
 名字集者是虛妄法虛妄法者常無如是體  
 種種分別名字不成即言語相是故我說非  
 無為善男子言有為者但是名字若離有為  
 無為法者彼亦如是善男子而非無事說彼  
 言語善男子何者為事而言聖智知聖智見  
 無言證法為彼無言證法故說名非有為善  
 問菩薩言佛子云何彼事無言所證聖智知

聖智見而言為彼無言證法說彼有為無為  
 言語深密解脫菩薩言善男子譬如幻師幻  
 師弟子住四衢道積聚草木枝葉瓦石在於  
 一處示現種種幻術所作所謂象馬車步諸  
 兵摩尼真珠瑠璃珂貝珊瑚琥珀磔瑪瑙  
 錢財穀帛庫藏諸物示如是等種種異事善  
 男子有諸愚癡無智凡夫見聞彼事不知彼  
 是草木瓦石生如是心實有此諸象馬車步  
 摩尼真珠瑠璃珂貝珊瑚琥珀磔瑪瑙錢  
 財穀帛庫藏等物以現見故彼愚癡人如是

見聞即取修行畢竟為實餘者虛妄善男子  
彼人復更須求上上法善男子復有智慧非  
愚癡者見象馬等知是草木瓦石等體彼人  
見聞生如是心彼諸如是象馬車等我見非  
實此幻所作有此象馬車步兵等虛妄之相  
種種異事幻惑人眼彼智慧人如所見聞不  
取為實亦不執著亦不取此畢竟為實餘者  
虛妄而知為義取彼言語此人不須更觀勝  
法善男子凡夫衆生未得聖人出世間智亦  
復如是凡夫愚癡不如實知無言語法見聞

有為無為之法生如是心有此有為無為之  
法如我見聞是故彼人如所見聞畢竟而取  
執著為實如所見聞如是受行此畢竟實餘  
者虛妄彼人更須觀察勝法善男子復有衆  
生非是愚癡見於實諦得諸聖人出世間智  
如實能知一切諸法證無言語真實法體而  
彼衆生見聞有為無為之法生如是心如所  
見聞無如是等有為無為名字等法復作是  
念有此有為無為言說從虛妄分別行相而  
生如彼幻法迷惑於智以生有為無為差異

名相彼人了知不如見聞如是取著此是真  
實餘者虛妄為顯彼義而取言語彼人不須  
更觀勝法善男子如是彼事聖人智知聖人  
智見無言所證為欲證彼無言之法說彼有  
為無為名相爾時深密解脫菩薩而說偈言

深義無言語 諸佛說不二 癡人依無明

戲論著二法 長行世間道 往來無休息

生於畜生中 以離第一義

聖者曇無竭菩薩問品第三

爾時聖者曇無竭菩薩摩訶薩依於如實第

一義諦過諸一切世間覺觀境界之相白佛  
言世尊我憶過去世復過彼過去世離此世  
界七十七恒河沙世界過彼無量恒河沙世  
界已有佛國土號名稱世界彼中有佛名毗  
摩羅吉諦如來住彼國土我於爾時遊化眾  
生往彼世界爾時見有一外道師止住一處  
有七萬七千弟子聚集其所依第一義相思  
惟諸法彼諸外道遞共推覓第一義相稱量  
第一義相觀察第一義相觀察不見第一義  
相生異異意異異見異異執著立異朋黨起

於諍論口力交諍出不善言迭共相亂起散  
而去世尊我於爾時即生心念希有諸佛如  
來出世以依如來出世間故今得見聞過於  
一切世間境界第一義相得證第一義相見  
第一義相證一切滅相爾時世尊告曇無竭  
菩薩言曇無竭如是如是我覺過諸世間境  
界第一義相如是覺已而為人說以示於人  
顯示於人建立是法何以故我為聖人說我  
內身自所證法為諸凡夫說覺觀境界遍共  
所知曇無竭汝今當依此義而知所謂過諸

世間境界是第一義相復次曇無竭我說第  
一義者是過一切諸相境界覺觀者是名諸  
相境界如是我說第一義者是無言境界覺  
觀者是言說境界曇無竭我說離諸言語是  
第一義相覺觀名字是世諦相如是我說離  
諸諍論是第一義相覺觀名字是諍論相曇  
無竭依此義相汝今應知過諸世間覺觀境  
界是第一義相曇無竭譬如有人盡於一形  
取辛苦味樂辛苦味彼人不能知不能覺不  
能量不能信石蜜阿娑婆等甘美之味曇無

竭有人長夜信貪欲樂樂著貪欲為貪欲火  
 燒其內心身不能知不能覺不能量不能信  
 離諸一切色聲香味觸無貪欲樂曇無竭有  
 人長夜信分別樂樂於分別不能知不能覺  
 不能量不能信內身寂靜無分別樂曇無竭  
 有人長夜樂見聞覺知樂信樂而行彼人不  
 能知不能覺不能量不能信內身寂滅離見  
 聞覺知樂曇無竭如人長夜取我我相樂信  
 樂而行彼人不能知不能覺不能量不能信  
 比鬱單越無我我所樂曇無竭如是覺觀之

人不能知不能覺不能量不能信離諸覺觀  
 第一義相爾時世尊而說偈言  
 我說身證法 第一離言境 離覺觀諍相  
 無言第一義  
 聖者善清淨慧菩薩問品第四  
 爾時聖者善清淨慧菩薩摩訶薩依第一義  
 過一異相白佛言世尊世尊善說希有妙法  
 第一義諦微細極微細甚深之義過一異相  
 所謂難證之法世尊我憶往昔在於一處見  
 住信行地諸菩薩等集坐一處思有為行第

一義諦爲一爲異有諸菩薩言有爲行相異  
第一義復有菩薩作如是言非有爲行異第  
一義而作是言有爲之行不異第一義復有  
菩薩生於疑心而起異意作如是言此諸菩  
薩中何者是實說何者虛妄說何者是正念  
修行法何者是邪念修行法世尊我見彼諸  
菩薩作是思惟此諸善男子等皆是愚癡非  
善點慧不善知法墮邪念中何以故以不能  
知有爲之行微細無相過一異相第一義相  
故爾時佛告善清淨慧菩薩摩訶薩言善清

淨慧如是如是彼諸一切善男子等皆是愚  
癡不善點慧不知正法墮邪念中何以故以  
不能知有爲行相過一異相第一義相故何  
以故善清淨慧若有爲行不異第一義相者  
一切愚癡諸凡夫等悉亦應見第一義諦即  
凡夫身亦應得彼無上清涼涅槃之樂亦應  
得彼阿耨多羅三藐三菩提善清淨慧若有  
爲行不異第一義相者見第一義諦時應見  
有爲行相若有爲行相是有相者相即是縛  
不應得解脫若見實諦不離相縛者不應得

解亦不得脫煩惱之縛以不離彼二種縛故不應得彼無上清涼涅槃之樂亦不應得阿耨多羅三藐三菩提善清淨慧以是義故愚癡凡夫不見實諦亦非即此凡夫之身得彼無上清淨涅槃亦非即彼凡夫之身能得阿耨多羅三藐三菩提是故見實諦者不應見彼有爲無爲一異行相是故彼人見有爲行相第一義相一異之義不成一異善清淨慧汝當應知彼諸菩薩言有爲之行第一義相是一是異者彼諸菩薩非正念是邪念復次

善清淨慧若有爲行相第一義相二不異者如有爲行墮在染相第一義相亦應墮染善清淨慧若有爲行相離第一義相異者如是一切有爲之行不應與彼第一義同善清淨慧第一義諦不墮一切煩惱染中以是得言有爲之行第一義諦得言同相是故善清淨慧汝不應言有爲行相第一義諦有一有異復次善清淨慧若有爲行相第一義相二不異者第一義諦不異有爲一切諸行如是一切有爲之行亦應不異第一義相而彼有爲

異第一義若不異者如實行者見聞覺知有  
爲行相不應更求無上勝法善清淨慧若有  
爲行相第一義相不異者即有爲行應名無  
我無自體相是第一義相善清淨慧復有過  
失謂於一時差別異相此是染相此是淨相  
是故善清淨慧第一義相異有爲行相而非  
不異有爲行相是故彼諸如實行者見聞覺  
知更求勝法以如實知有爲行故得於無我  
第一義名而不一時有染有淨二相差別是  
故離彼有爲行相第一義相不一不異義亦

不成善清淨慧彼諸菩薩作如是言有爲行  
相第一義相不一不異者彼諸菩薩不名善  
說善清淨慧汝當應知彼諸菩薩不名正念  
如實修行是名邪念善清淨慧譬如珂白不  
可說一不可說異如是金黃篲<sup>十一</sup>侯妙聲沉水  
香味<sup>十一</sup>華荑辛味訶黎勒苦味甘蔗甜味兜羅  
柔輓酥乃至醍醐不可說一不可說異善清  
淨慧如是一切有爲行體無常之相不可說  
一不可說異一切有漏所有苦相不可說一  
不可說異一切法中無我之相不可說一不

可說異貪嗔癡染不寂靜相不可說一不可  
 說異善清淨慧如是一切有為之行第一義  
 相不可說一不可說異善清淨慧如是我得  
 細微細深甚深難證極難證過一異相第一  
 義諦覺覺已為人說示開示現示建立爾時  
 如來而說偈言

有為界實諦 一異相離相 若分別一異  
 彼癡非正念 彼人為相縛 及為煩惱縛  
 修毗婆舍那 奢摩他得脫  
 慧命須菩提問品第五

爾時世尊依一切處一味等味第一義諦告  
 慧命須菩提言須菩提汝知一切眾生界中  
 幾所眾生依我我慢說我所得須菩提汝知  
 一切眾生界中幾所眾生離我慢說我所  
 得須菩提白佛言世尊我於眾生界中實少  
 見眾生離我慢說我所得世尊而我實見  
 無量阿僧祇不可說眾生於眾生界中依我  
 我慢說我所得世尊如我憶念過去世時住  
 於一處阿蘭若園爾時多有諸比丘等依於  
 我所四面而住世尊我於爾時見彼比丘於

日西下聚集一處取種種法相說爲證法世  
尊有諸比丘取於陰相說爲證法有諸比丘  
見陰生相說爲證法有諸比丘見陰滅相說  
爲證法有諸比丘說陰滅法有諸比丘說陰  
滅現證法有諸比丘見於入相說爲證法有  
諸比丘取十二因緣相說爲證法有諸比丘  
取起行相說爲證法有諸比丘取於諦相說  
爲證法有諸比丘取諦因相說爲證法有諸  
比丘取知諦相說爲證法有諸比丘取離諦  
相說爲證法有諸比丘取證諦相說爲證法

有諸比丘取修行諦相說爲證法有諸比丘  
取界法相說爲證法有諸比丘取於界相說  
爲證法有諸比丘取種種界相說爲證法有  
諸比丘取無量界相說爲證法有諸比丘取  
滅界相說爲證法有諸比丘取滅界證相說  
爲證法如是諸比丘取四念處相說爲證法  
有諸比丘取四念相說爲證法有諸比丘取  
四念處對治相說爲證法有諸比丘取四念  
處修行相說爲證法有諸比丘取未生四念  
爲生四念處修行相故說爲證法有諸比丘

取已生四念處為不失修行相故說為證法  
有諸比丘取已生四念處為增廣修行相故  
說為證法如是諸比丘取四正勤四如意足  
五根五力七覺分八正道未生為生為住為  
不忘失為增廣取相說為證法世尊我見彼  
諸比丘生如是念是諸比丘以著我相取我  
如二  
慢相如是說證何以故以不能知第一義諦  
一味等味相是故世尊我作是念世尊出世  
希有希有善說勝法一切處第一義一味等  
味微細甚深難覺難知何況外道而能得解

佛告須菩提如是如是如汝所說我所證法  
細微極細微甚深極甚深難覺極難覺一切  
處一味等味相第一義諦是我所證證已為  
人開示演說示極示開示現示何以故須菩  
提所謂陰界入因緣起行實諦境界念處正  
勤如意根力覺道等須菩提我說五陰中清  
淨觀三十七品是第一義相一切陰界入念  
處正勤如意根力覺道一味等味相須菩提  
依於此義汝今應知一切處一味等味第一  
義相復次須菩提如實修行比丘如實知一

陰如第一義諦法無我於餘界入因緣起行  
界念處正勤如意根力覺道等更不別觀真  
如第一義法無我惟依隨順真如依止不二  
法證一切處一味等味第一義相須菩提汝  
依此義應如是知所謂一味等味第一義相  
復次須菩提如彼陰界入因緣起行界念處  
正勤如意根力覺道等彼彼差別若真如第  
一義諦法無我有差別相者真如證法第一  
義諦亦應有因若有因者應從因生若從因  
生應是有為若是有為不應得名第一義諦

若非第一義諦者應更推求第一義諦須菩  
提是故真如第一義諦法無我非從因生亦  
非有為法亦非不第一義諦亦非為彼第一  
義諦更求第一義諦惟是常常時恒恒時如  
來出世若不出世法性常住法體常住法界  
常住須菩提汝依此義應知此諸一切法相  
一味等味第一義諦須菩提譬如無量種種  
色相無量差別無相無有分別無有差異一  
切處虛空等味一相無相須菩提一切諸法  
自相差別一切處一味等味第一義相無有

劫一

十四

分別爾時世尊而說偈言

如來應說法 一切一味相 不離第一義

見別是憍慢

聖者廣慧菩薩問品第六

爾時聖者廣慧菩薩摩訶薩依於心相白佛

言世尊如來說諸菩薩善知心意識深密

法者世尊云何菩薩善知心意識深密之

法世尊以何義故如來說諸菩薩善知心意

意識深密之法爾時世尊告廣慧菩薩言善

哉善哉廣慧汝今乃能問於如來如此深義

廣慧汝能為與一切衆生安隱樂具悉令滿

足廣慧汝為哀愍一切天人多所安樂多所

饒益乃能問我如是之義善哉廣慧諦聽諦

聽我為汝說心意意識深密之義廣慧於諸

六道生死之中何等何等衆生初一胎生十五濕

生化受身生身及增長身初有一切種子

心性和合不同差別增長廣所成就依二種

取何等二種一者謂依色心相取二者依於

不分別相言語戲論熏習而取廣慧色界中

依二種取生無色界中非二種取生廣慧彼

識名阿陀那識何以故以彼阿陀那識取此  
身相應身故廣慧亦名阿黎耶識何以故以  
彼身中住著故一體相應故廣慧亦名爲心  
何以故以彼心爲色聲香味觸法增長故廣  
慧依彼阿陀那識能生六種識所謂眼耳鼻  
舌身意識身廣慧若一境界現前一識身起  
無分別意識即共眼識一時俱生廣慧若二  
三四五境界現前五識身起無分別意識即  
與五識一時俱生廣慧譬如流水若一緣起  
即生一波若二若三乃至衆多因緣俱起即

生衆波廣慧而彼流水亦不斷絕復次廣慧  
譬如無垢清淨明鏡若有一像因緣現前即  
見一像若有二三衆多像現即能具見衆多  
異像廣慧而彼明鏡爲彼種種諸像不異廣  
慧如彼流水明鏡像等依止阿陀那識住持  
阿陀那識若一眼識因緣現前即一意識共  
彼眼識同時取境廣慧若五識身五種因緣  
一時現前無分別意識即共五識一時取境  
廣慧如是菩薩摩訶薩依法住智如實善知  
心意意識深密之法廣慧而佛不說諸菩薩

等是善解知心意意識深密之法廣慧若善  
 薩不見內外阿陀那不見阿陀那識能如實  
 知不見阿黎耶不見阿黎耶識不戲論心不  
 見眼不見色不見眼識不見耳不見聲不見  
 耳識不見鼻不見香不見鼻識不見舌不見  
 味不見舌識不見身不見觸不見身識廣慧  
 菩薩不見內外意不見內外法不見內外意  
 識能如實知廣慧我說如是諸菩薩等善知  
 第一義廣慧是故我說菩薩應知心意意識  
 深密之法廣慧菩薩如是解知心意意識深

初一

十六

密法已我說是人是真菩薩爾時世尊而說

偈言

諸種阿陀那

能生於諸法

我說水鏡喻

不為愚人說

深密解脫經卷第一

深密解脫經卷第二

効二

元魏天竺三藏法師 菩提留支 譯

聖者功德林菩薩問品第七

爾時聖者功德林菩薩摩訶薩依一切法相  
白佛言世尊世尊說諸菩薩善知法相世尊

効二

菩薩善知諸法相者云何名善知諸法相世  
尊菩薩能知幾種法故名爲善知一切法相  
而如來說菩薩善知一切法相爾時佛告功  
德林菩薩摩訶薩言善哉善哉功德林汝今  
乃能問佛此義功德林汝能爲與一切衆生

安隱樂具悉令滿足功德林汝能哀愍一切  
人天多所安樂多所饒益乃能問我如是之  
義善哉善哉功德林汝今一心諦聽諦聽我  
爲汝說功德林一切法相有三種相何等爲  
三所謂虛妄分別相因緣相第一義相功德  
林何者虛妄分別相所謂名相所說法體及  
種種相名用義等功德林何者諸法因緣之  
相所謂十二因緣依此法生彼法謂依無明  
緣行乃至生大苦聚處功德林何者是諸法  
第一義相所謂諸法真如之體諸菩薩等正

念修行至心修行證不二法證彼法已乃至  
 得成就阿耨多羅三藐三菩提功德林譬如  
 有人目中有翳是眼識過功德林虛妄分別  
 亦復如是功德林譬如有人眼中有翳見毛  
 輪蠅及胡麻子青黃赤白等相現前功德林  
 因緣之相亦復如是功德林譬如有人眼淨  
 無濁離眼翳過即彼眼見自性境界不生迷  
 惑功德林第一義相亦復如是功德林譬如  
 世間清淨瑠璃置青色中即因陀羅青色出  
 大因陀羅摩尼寶光明因陀羅青色大因陀

羅摩尼之寶光明現前迷惑衆生以為青寶  
 功德林即彼清淨瑠璃之體置赤色中即出  
 赤波頭摩尼之寶光明現前迷惑衆生以為  
 赤寶功德林即彼清淨瑠璃之體置綠色中  
 即出綠色摩尼之寶光明現前迷惑衆生以  
 為綠寶功德林即彼清淨瑠璃之體置黃色  
 中即出金色摩尼之寶光明現前迷惑衆生  
 以為金寶功德林如彼清淨瑠璃之中種種  
 異色如是他力因緣相中虛妄分別名字章  
 句熏習之體亦爾應知功德林如彼清淨瑠

璃因陀羅青色大因陀羅青色因赤色綠色  
黃色爲金等寶種種現前迷惑衆生皆以爲  
寶功德林如是他力因緣相中虛妄分別名  
字章句亦爾應知功德林如彼清淨白瑠璃  
體他力因緣亦爾應知功德林即彼清淨瑠  
璃之體無彼因陀羅青色大因陀羅青色無  
彼青寶赤綠黃金等寶如是寶體常常時恒  
恒時無如是等一切寶體功德林即彼他力  
因緣相中彼虛妄分別名字章句常常時恒  
恒時無如是等虛妄分別名字章句體相應

知功德林而依名相因緣分別因緣相應知  
功德林依虛妄因緣執著名相是故見他力  
因緣功德林依他力因緣執著虛妄分別之  
相見第一義相功德林菩薩於彼因緣相中  
如實能知是知虛妄分別之相菩薩爾時名  
爲能知諸法無相功德林菩薩若知因緣法  
相如實知諸因緣法已能如實知諸法染相  
能如實知染相法已能知第一義相能如實  
知第一義相已能如實知清淨法相功德林  
菩薩若於他力因緣法中能如實知無相之

法如實知已遠離染法離染法已得證一切

清淨法相功德林菩薩如實能知虛妄法相

能知他力因緣法相能知第一義相無相如

實能知染相淨相離染法相證淨法相功德

林菩薩摩訶薩應當如是善知諸法是故佛

說菩薩摩訶薩善知諸法爾時世尊而說偈

言

如實知諸法

即捨染法相

捨染法相已

證於清淨法

不觀有為過

懈怠放逸害

諸法常不動

離相名菩薩

聖者成就第一義菩薩問品第八

爾時聖者成就第一義菩薩依無體相第一

義相白佛言世尊世尊我獨在於空閑之處

生覺觀心作如是念如來種種說於諸陰自

體相法所謂能知生滅之相離於如是諸入

因緣而起諸行如是說諸諦自體相所謂知

離證修如是說諸界自體相種種別相種種

界相無量界相如是說諸念處正勤如意根

力覺道自體對治修行未生令生已生令增

廣世尊復說一切法本來無體一切法本來

不生一切法本來不滅一切法本來寂靜一切法本來自性涅槃世尊是故我問如來此義如來何意作如是說爾時佛告成就第一義菩薩言善哉善哉成就第一義汝能如是正念思惟生此覺觀復言善哉成就第一義汝今乃能問佛此義何以故汝為安樂一切眾生安隱一切眾生為欲利益一切眾生安隱一切天人故問此義成就第一義汝一心聽我意何故作如是說一切法本來無體相一切法本來不生一切法本來不滅一切法

本來寂靜一切法本來涅槃成就第一義我意依彼一切諸法三種無體相故說言一切諸法無自體何等為三所謂依諸法無自體相無生體相第一義諦無自體相成就第一義諸法無自體相者諸分別相何以故以彼諸法隨名相說非有自體是故我言無自體相成就第一義何者諸法無生體相謂因緣法無自體相何以故以彼法生依他力因緣非自體相是故我說無生體相成就第一義何者是第一義無體相成就第一義第一義

無體相者一切諸法本無生體是故我說一切諸法無自體相以彼依於因緣生故以依第一義無體相故何以故成就第一義於諸法中清淨觀相我說彼是第一義相成就第一義以他力相中清淨觀故是故我說第一義諦無自體相成就第一義一切諸法無成就相是故我說第一義諦無自體相何以故成就第一義一切諸法無我無我體相是故我說一切諸法無自體相成就第一義以是彼法依無體得名是故我說第一義諦無自

體相成就第一義如空中華無自體相一切諸法無自體相亦復如是是故我說一切諸法無自體相法應如是成就第一義譬如幻師幻作一切種種色像諸因緣法無自體相亦復如是是故我說諸因緣法無自體相成就第一義如空中華無自體相第一義諦無自體相亦復如是是故我說第一義諦無自體相成就第一義我意依此三種法無自體相故說言諸法無自體相復次成就第一義我意依相無自體相說言諸法無自體相一

切諸法本來不生一切諸法本來不滅一切諸法本來寂靜一切諸法本來涅槃何以故成就第一義若一切法無自體相彼法不生若法不生彼法不滅若法不滅不生彼法本來寂靜若法本來寂靜彼法本來清淨若法本來清淨彼法本來涅槃若如是彼法無有少法可滅令入涅槃成就第一義是故我意依彼相說一切諸法無自體相是故我說一切諸法本來不生復次成就第一義第一義者依無我得名是故我意依第一義無體相

故說言諸法本來不生何以故成就第一義以第一義法無我得名是故名為第一義諦無自體相常常時恒恒時一切法體常住謂無為體離諸一切煩惱相應若法常常時恒恒時依彼法體住彼法不生不滅以無為故若法無為彼法本來寂靜若法本來寂靜彼法本來涅槃以遠離一切煩惱毒相應故是故第一義法無我得名我說諸法無自體相一切法本來不生一切法本來不滅一切法本來寂靜一切法本來涅槃成就第一義一

切衆生衆生界中不知不覺虛妄分別法體差別亦不能知他力因緣法體差別亦復不見第一義諦法體差別是故我說三種法無自體相成就第一義而諸衆生虛妄分別諸法體相他力法體第一義體虛妄分別名字體相說因緣法第一義法成就第一義一切衆生如是如是說如是受用依名字心依隨順心依名用使心依彼分別名字體相執著他力因緣法體第一義體成就第一義如是如是執著如是如是依他力法虛妄執著因

緣法體依彼因緣生未來世他力法體爲煩惱染業染生染流轉六道長夜受苦不能出離生死苦縛所謂地獄畜生餓鬼阿脩羅天人諸趣成就第一義隨所有衆生不種善根不能清淨一切罪業不能成就諸善根力不多信法不集功德智慧之業我爲彼說諸法不生彼諸衆生聞我所說因緣和合有爲行生彼衆生知諸法無常不恒不可歸依異異轉滅於諸一切有爲行中生驚怖心生遠離心生驚怖心生遠離心已彼諸衆生不行惡

法修行善法修行善法者依善法因不種善根者種諸善根不清淨罪業者清淨罪業不成熟諸根者能令成熟依彼成熟善根力故能多信法多信法者能集功德智慧之藏成就第一義彼諸衆生雖種善根乃至能集一切功德智慧之藏成就第一義而彼衆生於彼因緣諸法之體無生體相及第一義無體相法不如實知不如實知故於諸一切有爲行中不能生厭不能遠離是故彼諸一切衆生不得解脫煩惱染業染生染成就第一義

如來爲彼諸衆生故重說彼法所謂因緣無體第一義無體今彼衆生於有爲行生厭離心爲得解脫煩惱染業染生染彼諸衆生聞我所說於彼諸法無生相中於一切法虛妄分別中第一義諦無體相中能生正信思惟彼法如實覺知於他力中不生執著虛妄分別諸法體相但知惟是名用得名惟是隨順名用得名惟是隨順名用諸使煩惱得名是故彼諸一切衆生能滅他力因緣諸相依於現法智慧之力斷彼未來一切因緣是故依

彼因緣正見能離一切有爲諸行厭離一切有爲行已得正解脫遠離業染煩惱染生染成就第一義聲聞性衆生依此道依此法得聲聞涅槃緣覺性衆生亦復如是依此道依此法得緣覺涅槃佛乘性衆生亦復如是依此道依此法得阿耨多羅三藐三菩提成就第一義是故我說聲聞緣覺菩薩一清淨道成就第一義惟一清淨道更無第二我意依此故說一乘成就第一義而衆生界中非無種種性軟中上根衆生成就第一義寂滅聲

聞性人一切諸佛盡力教化不能令其坐於道場得阿耨多羅三藐三菩提何以故成就第一義以彼自性本來陋劣一向少於慈悲之心一向怖畏一切諸苦以少慈悲一向捨於利益衆生成就第一義若一向畏苦一向離諸有爲之行彼人遠離利益衆生遠離能度諸衆生業是故我說彼人不能證阿耨多羅三藐三菩提我說名爲寂滅聲聞成就第一義發菩提心聲聞人者而我說彼名爲菩薩何以故以彼菩薩先離煩惱障得慧解脫

後離智障得心解脫彼菩薩如來初化依自身利益而得解脫是故我說彼是聲聞性人菩薩成就第一義我善說法中善如意法中善毗尼法中善清淨法中清淨法中不錯依種種性說種種法相成就第一義是故佛意依此三種無體相法說不了義修多羅法所謂諸法本來不生本來不滅本來寂靜本來涅槃成就第一義若有衆生種諸一切增上善根清淨罪業成就諸根多信諸法善集一切善根智慧彼諸衆生聞我法音能如實知

彼諸衆生信我法信我義智慧觀察能如實覺依彼證法隨順行力速得究竟阿耨多羅三藐三菩提我依彼諸一切衆生能於我身生恭敬心作如是言此是正覺知一切法是故名爲應正徧知成就第一義若有衆生不種一切增上善根不能清淨一切罪業不能淳熟一切善根不多信法無增上心不集功德智慧之藏直心體性不能觀察是法非法是法可取是法可捨依自心見執著而行彼諸衆生雖聞我法亦復不知依何意說而彼

衆生信於我法恭敬我法而作是言我信諸佛如來所說修多羅甚深甚深相依空相應難見難覺不可覺形相不可覺微細極微細黯慧人智慧境界如來說諸修多羅義我不能知默然而信而作是言諸佛如來菩提甚深諸法體相亦復甚深惟佛所知非我境界諸佛如來隨諸衆生種種信心說種種法以諸如來無量智慧所知如海而我知見如牛跡水是故衆生於彼修多羅若能至心受持書寫寫已任持讀誦供養爲他人說常讀常

誦隨喜施他而彼衆生不能於中如實修行以未知我甚深之意以不覺故成就第一義彼諸衆生依因彼故功德智慧增長滿足亦復令彼未淳熟心令得淳熟成就第一義復有衆生衆生界中不能種諸一切善根乃至不能成就功德智慧之業無直心無直意而彼衆生知是法是非法是可取是可捨自智生見是可取是可捨而彼衆生聞我所說甚深之法不知我意是故不知如實之法不知如實法故不能覺知一切諸法聞聲執著義

亦如是是故彼諸一切衆生說如是言諸法無體相一切法本來不生一切法本來不滅一切法本來寂靜一切法本來涅槃而彼衆生依因此見於諸法中起於邪見無諸法相墮於邪見以見諸法無無相以見諸法無無相故而謗一切諸法爲無所謂虛妄分別相因緣法體相第一義法體相何以故成就第一義依彼他力因緣體相依於第一義諦體相有名字相成就第一義若衆生見因緣體相第一義相言是無相彼衆生謗假名名字

相是故我說彼諸衆生謗三種相成就第一義彼諸衆生於無法中起法相於無義中生義相無法依法住持無義依義住持成就第一義彼諸衆生依我信法增長善法而取非義爲義智不增長智不增長者離諸善法於聞法衆生住持是法住持非義爲義墮於邪見彼諸衆生以取無法法相無義義相以取法法非義義相是故令諸一切衆生依不正見離諸善法應知成就第一義復有衆生於彼邪見人邊聞法說如是言諸法無體不生

劫二

十一

不滅寂靜涅槃驚懼怖畏而說是言此非佛語是魔所說是故彼諸邪見衆生謗諸修多羅說諸修多羅毀諸修多羅言是非法而彼衆生因彼謗法得無量罪成就無量極惡罪業成就第一義是故我說謗法衆生見無諸法亦無於義依義說法成就無量極惡罪業亦令無量諸衆生等多生罪業成就第一義若有衆生不種善根不清淨罪業不熟身業多不善法不能集彼功德智慧不直心不隨順直心而依自見邪智分別是法非法是法

可取是法可捨彼諸衆生雖聞我法不得我意不生信心亦復不能如實知我所說之意是故彼諸一切衆生於諸非法生於法想於諸非義生於義想執著非法生是法想執著非義生是義想而作是言此非佛語是魔所說而彼邪智如是解故而謗諸法不順諸法毀訾諸法輕論諸法於正法中加置邪法爲滅修多羅爲壞修多羅爲不行修多羅爲不說修多羅於信修多羅者生怨家想彼諸衆生先有無量罪業重障復因謗法而謗於人

轉更增長無量罪障而彼罪障根本之罪不可說盡何況復加謗法之罪墮大地獄無有出期乃至無量百千萬億阿僧祇劫說其歲數亦不能盡成就第一義我今善說如是諸法善示善清淨善說衆生如是種種異信種

勅二

十二

種異見爾時世尊而說偈言

無法體不生 本寂靜不滅

是故我說常 三種無體相

若能知我意 是人得解脫

諸衆生解脫 是故一乘法

自性涅槃法

第一義無體

一道法進趣

隨聞差別說

諸衆生無量 爲身求涅槃 如來甚希有

安隱諸衆生 若證無漏法 平等無二相

成就佛諸義 彼人離煩惱

爾時成就第一義菩薩白佛言希有世尊來

曾有未曾聞如來所說如是微細極微細甚

深極甚深難覺極難覺諸佛如來意趣難知

世尊我知如來所說義意所謂分別境界彼

依分別有爲行相於名字中說彼色陰自體

相相名爲勝相所謂色陰生色陰滅離色陰

知色陰是故如來依彼法相說彼諸法爲無

體相世尊彼分別境界依彼分別境界行相  
 是他力相是故如來依於彼法而說諸法不  
 生諸法無體亦依彼法說第一義言無體相  
 世尊我知世尊所說法義謂即依彼分別境  
 界虛妄分別有為行相即彼虛妄分別之相  
 無如是相即彼無體相無體相法無我真如  
 清淨觀相是第一義是故如來依第一義說  
 彼諸法名無體相世尊如一色陰餘陰亦如  
 是如是十二入十八界一一入一切法亦如  
 是世尊我知如來所說法義所謂分別境界

中虛妄分別有為行相所謂苦諦知苦諦依  
 於名字說自體相勝相虛妄分別如來依彼  
 說言諸法無有體相世尊彼分別境界相依  
 止分別有為行相名因緣相世尊是故我說  
 我知如來所說法義何以故世尊即彼分別  
 境界分別諸相依止虛妄行相而生而彼虛  
 妄分別行相無如是體無如是相是法無我  
 真如清淨觀名第一義是故如來依彼法說  
 第一義無體相世尊如苦諦餘諦亦如是如  
 是四念處四正勤四如意足五根五力七覺

分八聖道以要言之一切諸法亦復如是世尊我知世尊所說法義於分別境界中依虛妄分別有爲行相正覺三昧對治對治生正三昧生三昧已而復住持不忘不失修行增長名字所說法相勝相是分別相是故如來依彼法相說言諸法無有體相世尊彼分別境界依止他力因緣行相是他力相是故如來依彼法相說言諸法無有體相亦說第一義是無體相世尊我知世尊所說法義相依止分別名字境界即彼分別名字行相無如是

相即彼無相體真如法無我清淨觀相即第一義相是故世尊說言諸法無有體相是第一義相世尊譬如毗舒婆藥草著諸藥中一切食中世尊如來說法亦復如是諸法無體相諸法不生諸法不滅諸法寂靜諸法自性涅槃說了義修如二多羅十四置於一切不了義修多羅中世尊譬如畫地種種一相所謂青黃赤白能了別彼種種畫相世尊如來說法亦復如是諸法無體相不生不滅寂靜自性涅槃了義言教置於一切不了義中成一味相亦

能了別彼不了義修多羅等名字故世尊譬  
 如一切諸飲食中若置熟酥生增上味佛說  
 此法亦復如是依一切法無有體相不生不  
 滅寂靜自性涅槃說此了義修多羅置諸一  
 切了義中能生增上歡喜踊躍世尊譬如虛  
 空一切處等於諸一切種種作業無有障礙  
 皆悉能成世尊如來亦爾說言諸法無有體  
 相諸法不生諸法不滅諸法寂靜諸法自性  
 而是涅槃說了義經於諸一切不了義經等  
 同一味成就一切聲聞辟支佛大乘修行作

無障礙爾時世尊告成就第一義菩薩言善  
 哉成就第一義復作是言善哉善哉成就第  
 一義汝實能知諸佛如來說法之意汝今善  
 說此義譬喻如彼毗舒婆樂草書地置酥虛  
 空等譬成就第一義如是如是如汝所說不  
 異汝說如是受持爾時成就第一義菩薩白  
 佛言世尊如來初成應等正覺於波羅奈城  
 仙人集處諸禽獸遊處為諸修行聲聞行人  
 一轉四諦希有法輪世間一切沙門婆羅門  
 天人魔梵無能轉者若有能轉依法相應無

如二  
 十五

有是處世尊此第二轉法輪說上法相可入法相分別彼諸不了義修多羅爲住大乘衆生說於諸法無有體相諸法不生諸法不滅諸法寂靜諸法自性涅槃希有之中復是希有世尊此是第三轉法輪爲住一切大乘衆生說諸法無體相不生不滅寂靜自性涅槃善說四諦差別之相希中希有無人能入無人能對無人能諍更無有上更無有勝了義修多羅無有論處爾時成就第一義菩薩白佛言世尊若善男子善女人聞如來說諸法

本來無體相本來不生本來不滅本來寂靜本來自性涅槃正信書寫寫已受持供養施與他人爲自說自讀自誦修行隨喜彼善男子善女人得幾所功德爾時世尊告成就第一義菩薩摩訶薩言彼善男子善女人成就無量阿僧祇功德與成就第一義彼之功德無有譬喻可以況說以要言之略說少分成就第一義譬如指甲上土依大地土百分不及一迦羅分不及一憂波尼沙陀分不及一乃至算數譬喻不能及一成就第一義譬如

牛跡中水依大海水百分不及一千分不及  
 一迦羅分不及一憂波尼沙陀分不及一乃  
 至算數譬喻亦不及一成就第一義如是我  
 說信不了義修多羅乃至修行不了義修多  
 羅所得功德依此所說了義修多羅中於信  
 心乃至修行所得功德受持讀誦彼不了義  
 修多羅百分不及一千分不及一萬分不及  
 一迦羅分不及一憂波尼沙陀分不及一乃  
 至算數譬喻所不能知爾時成就第一義菩  
 薩白佛言世尊此深密解脫修多羅中此法

劫二

十六

門名爲何等法云何奉持佛言成就第一義  
 此法門名說第一義了義修多羅汝應如是  
 受持佛說此法門時六千衆生發阿耨多羅  
 三藐三菩提心三百千聲聞遠塵離垢得法  
 眼淨復有五百千聲聞得無漏心解脫十萬  
 五千菩薩得無生法忍

深密解脫經卷第二

音釋

蠅余陵切 陋陋胡夾切 毀毀許  
青蠅也 劣劣力鞞切 訾委切  
此切譏也 將

深密解脫經卷第三

元魏天竺三藏法師 菩提留支 譯

三

聖者彌勒菩薩問品第九

爾時聖者彌勒菩薩摩訶薩依奢摩他毗婆舍那所攝法相白佛言世尊世尊菩薩依止何法住持何法於大乘中修行奢摩他毗婆舍那佛告彌勒菩薩言彌勒依說諸法差別之相及能住持阿耨多羅三藐三菩提心彌勒如我所說四種觀法菩薩依彼四種觀法修行大乘奢摩他毗婆舍那何等為四一者

分別觀二者無分別觀三者事別四者所作成就彌勒菩薩問佛言世尊有幾種奢摩他觀佛言彌勒惟有一種奢摩他觀所謂無分別觀彌勒菩薩復白世尊可有幾種毗婆舍那觀佛言彌勒惟有一種所謂差別觀彌勒菩薩復言世尊有幾數名向二觀佛言彌勒有於二種一者事別二者事成就彌勒菩薩言世尊云何菩薩依四種法修行奢摩他毗婆舍那觀善知奢摩他毗婆舍那佛言彌勒如我為諸菩薩所說差別法相所謂修多羅

祇夜和伽羅那伽陀憂陀那尼陀那阿婆陀  
那伊帝憂多伽闍多伽毗佛略阿浮陀檀摩  
憂婆提舍彌勒一切菩薩於如是等修多羅  
中應善諦聽口常善誦心常善知智常善觀  
慧如實覺彌勒諸菩薩等於彼修多羅中善  
思惟已於空閑處獨坐觀察觀察彼心內常  
隨順如是觀心如是不斷心彼菩薩得身樂  
心樂彌勒是名我說菩薩修行奢摩他法彼  
菩薩得身心樂已依身心樂觀所說法如向  
思惟一切諸法觀察內心三昧境界像能信

諸法離於思惟彌勒諸菩薩等如是觀彼三  
昧鏡像可知彼義覺觀思惟恐怖見意知覺  
現前彌勒是名我說菩薩修行毗婆舍那彌  
勒諸菩薩等應當如是善知毗婆舍那爾時  
聖者彌勒菩薩白佛言世尊世尊菩薩未得  
內心觀像未得身樂未得心樂佛說彼觀名  
何等觀佛言彌勒非奢摩他是隨順奢摩他  
是故我說名爲隨順信奢摩他彌勒菩薩言  
世尊菩薩未得身樂心樂觀於內身三昧境  
界思惟彼法如是觀心佛說彼觀名何等觀

佛言彌勒我說彼觀非毗婆舍那名隨順信  
毗婆舍那彌勒菩薩言世尊說奢摩他行毗  
婆舍那行爲一爲異佛言我說非異非不異  
彌勒以何義故我說不異毗婆舍那觀不離  
奢摩他是故不異彌勒以何義故我說是異  
以觀分別鏡像差別是故爲異彌勒菩薩言  
世尊毗婆舍那三昧境界爲異彼心不異彼  
心佛言彌勒我說不異何義不異以惟是心  
觀彼鏡像何以故我說但是心意識觀得名  
故彌勒菩薩言世尊若彼心鏡像不異於心

云何心即能觀於心佛言彌勒彼處無有一  
法能觀一法而彼心生如是現見彌勒譬如  
清淨明鏡依因鏡像能見鏡像而不作心我  
見鏡像依彼鏡像現見鏡像彌勒如彼心生  
不離於心離心見境彼三昧鏡像現見境界  
彌勒菩薩言世尊一切衆生所有心法色等  
境界爲異於心爲不異心佛言彌勒不異於  
心而諸凡夫顛倒智取不能識知但是心法  
以不如實知彼種種鏡像顛倒取顛倒法彌  
勒菩薩言世尊云何菩薩一向修行毗婆舍

那佛言彌勒若菩薩隨順觀彼心相不斷如是菩薩一向修行毗婆舍那彌勒菩薩言世尊云何菩薩一向觀彼奢摩他法佛言彌勒若菩薩隨順觀彼心相不斷如是菩薩一向觀彼奢摩他法彌勒菩薩言世尊云何菩薩奢摩他毗婆舍那二法和合一時修行佛言彌勒若菩薩觀心一心如是奢摩他毗婆舍那一時修行彌勒菩薩言世尊何者是心相佛言彌勒所謂分別三昧境界鏡像觀毗婆舍那是名心相彌勒菩薩言世尊何者是心

無間佛言彌勒謂觀像心奢摩他觀是名心無間彌勒菩薩言世尊何者是心而言一心佛言彌勒所謂觀彼三昧鏡像覺知是心覺知是心已修真如觀彌勒是名一心彌勒菩薩言世尊毗婆舍那行有幾種佛言彌勒毗婆舍那有於三種何等三種一者相二者修行三者觀彌勒何者是相毗婆舍那所謂但觀三昧境界分別鏡像是名相毗婆舍那彌勒何者是修行毗婆舍那所謂智慧善見彼彼法相是名修行毗婆舍那彌勒何者是觀

毗婆舍那所謂彼彼法中智慧善觀彼彼法相而不證彼寂滅解脫彌勒是名善觀察修行毗婆舍那彌勒菩薩復言世尊奢摩他行有幾種佛言彌勒依前法後三種亦如是應知復次彌勒奢摩他有八種所謂初禪奢摩他如是二禪三禪四禪無邊空處無邊識處見少處非想非非想處復次彌勒有四種奢摩他謂慈奢摩他悲奢摩他喜奢摩他捨奢摩他彌勒菩薩言世尊如世尊說依止奢摩他毗婆舍那不依止奢摩他毗婆舍那世尊

何者是依止法何者是不依止法佛言彌勒如所聞法隨順法相彌勒是名依止法奢摩他毗婆舍那彌勒離所聞法思惟取法依他教觀奢摩他毗婆舍那義所謂觀彼諸相青黃赤白臭爛一切有行無常苦一切法無我一切法寂靜一切法涅槃如是等奢摩他毗婆舍那彌勒是名不依止法奢摩他毗婆舍那應知彌勒所謂依止法奢摩他毗婆舍那而我為彼隨順法相我說名為利根菩薩彌勒依止奢摩他毗婆舍那隨順他教我說名

為鈍根菩薩彌勒菩薩言世尊如世尊說差別觀奢摩他毗婆舍那法世尊何者是差別觀奢摩他毗婆舍那法世尊何者是差別觀奢摩他毗婆舍那法佛言彌勒若菩薩一觀修多羅等法如聞如取思惟諸法修行奢摩他毗婆舍那是名差別觀奢摩他毗婆舍那法彌勒若菩薩即彼修多羅等法作一段一分一聚如是思惟此一切法隨順真如流順真如隨向真如隨順彼真如隨順菩提隨順涅槃隨心識轉

隨順彼法隨向彼法如實能知無量阿僧祇諸善法相彌勒是名無差別觀奢摩他毗婆舍那法彌勒菩薩言世尊如世尊說少相差別觀奢摩他毗婆舍那法大相差別觀奢摩他毗婆舍那法世尊何者是少相差別觀奢摩他毗婆舍那法何者是大相差別觀奢摩他毗婆舍那法何者是無量相差別觀奢摩他毗婆舍那法佛言彌勒若菩薩差別觀修多羅一乃至憂波提舍作一段思惟彌勒是名少

相差別觀奢摩他毗婆舍那法彌勒若菩薩  
即彼修多羅等不差別作一段思惟彌勒是  
名大相差別觀奢摩他毗婆舍那法彌勒若  
菩薩諸佛如來說無量法無量名字無量章  
句無量上上智慧樂說辯才作一段思惟是  
名無量差別觀奢摩他毗婆舍那法彌勒菩  
薩言世尊云何菩薩證得差別觀奢摩他毗  
婆舍那法佛言彌勒有五種觀觀彼法何等  
五種所謂思惟奢摩他毗婆舍那念念滅一  
切煩惱身離種種相得法樂如實知十方無

量無畔齊知無量法光明所作成就相應清  
淨分無分別相現前為得成就法身證上上  
勝勝因彌勒菩薩言世尊何處隨順修行差  
別觀奢摩他毗婆舍那法何處證得差別觀  
奢摩他毗婆舍那法佛言彌勒初歡喜地菩  
薩摩訶薩隨順證初三少於第三光明地菩薩善  
證得應知彌勒初學菩薩亦修行此差別觀  
奢摩他毗婆舍那法學思惟不休息故彌勒  
菩薩言世尊何者奢摩他毗婆舍那有覺有  
觀三昧何者是無覺有觀三昧何者是無覺

無觀三昧佛言彌勒若菩薩隨如所聞攝受諸法於一切法覺觀相麤細隨順能生奢摩他毗婆舍那法是名有覺有觀三昧彌勒若菩薩於彼法相不了了麤細相隨順彼法修行而得彼法光明正念心隨順細觀察奢摩他毗婆舍那彌勒是名無覺有觀三昧彌勒若菩薩離一切相自然隨順法思惟觀察奢摩他毗婆舍那是名無覺無觀三昧復次彌勒初修行奢摩他毗婆舍那是名有覺有觀三昧彌勒若菩薩觀一切法是名無覺有觀

三昧彌勒若菩薩觀無差別法三昧是名無覺無觀三昧彌勒菩薩言世尊何者是奢摩他相何者是取相奢摩他何者是捨相奢摩他佛言彌勒若菩薩掉動心疑心中生驚畏心或欲遠離思惟諸法而不斷絕是名奢摩他相彌勒若菩薩心沉沒沉沒相疑思惟於法生歡喜心是名取相奢摩他彌勒若菩薩一向於奢摩他道一向毗婆舍那道雙觀二道煩惱不染於心自然思惟自然隨順彼法修行是名捨相奢摩他彌勒菩薩言世尊如

劫三

七

世尊說菩薩修行奢摩他毗婆舍那法如實知法如實知義世尊云何菩薩知法知義佛言彌勒若菩薩知五種觀法名如實知法何等爲五一者名二者句三者字四者差別五者同彌勒何者是名謂於染法淨法中觀自體相說法相彌勒是名爲名彌勒何者是句即彼法種種名相聚系法淨法義爲名用依止住持是名爲句彌勒何者是字即彼名句依彼二法名是名爲字彌勒何者是差別謂一一法別異觀是名差別彌勒何者是同所

謂無差別觀法說名爲同彌勒若菩薩如是觀者名爲如實知法彌勒云何菩薩觀義彌勒菩薩觀義有十種何等爲十一者所應修行者修行二者修行至究竟處二者知能取義四者知可取義五者知住持義六者知受用義七者知顛倒義八者知不顛倒義九者知染義十者知淨義彌勒若菩薩染淨法中一切種差別修行謂陰五種數內入六種數外入六種數如是等差別修行彌勒是名菩薩所應修行者修行彌勒若菩薩於染淨法

中如實知真如彌勒是名菩薩修行至究竟  
處復次彌勒真如有七種何等爲七所謂無  
始有爲行相真如相真如所謂我空法空惟  
識真如知有爲行惟是識心執著真如所謂  
我說苦諦邪行真如所謂我說集諦清淨真  
如所謂我說滅諦<sup>三</sup>正修行真如所謂我說道  
諦彌勒行相真如執著真如邪行真如此三  
真如一切衆生平等無差別彌勒相真如惟  
識真如此二真如一切法平等無差別彌勒  
清淨真如聲聞緣覺菩薩阿耨多羅三藐三

菩提平等無差別彌勒正修行真如如闍妙  
法差別觀奢摩他毗婆舍那攝取般若平等  
無差別彌勒菩薩知能取義者所謂五種入  
相及心意意識心數法是名知能取義彌勒  
可取義者所謂外六入彌勒能取義者即是  
可取義是名知能取可取義彌勒菩薩知住  
持義者所謂世界衆生住處依彼住處衆生  
可見所謂聚落地彼百聚落地彼千聚落  
地彼千萬聚落地名盡海畔地彼百千彼百  
千閻浮提彼百千彼百千萬名爲一千世界

彼一千世界百倍彼百倍千倍彼千倍百千  
 倍名爲二千中世界彼二千中世界百倍千  
 倍百千倍名爲三千大千世界彼三千大千  
 世界百倍彼復千倍彼千倍復百千萬倍彼  
 百千萬倍名爲一億彼一億百<sup>九</sup>倍彼百倍復  
 千倍彼千倍復一億彼一億復千億復千百  
 億名爲一阿僧祇彼百億千億彼千億百千  
 億彼百千億阿僧祇彼阿僧祇百阿僧祇彼  
 百阿僧祇千阿僧祇彼百千阿僧祇百千萬  
 三千大千百千萬阿僧祇世界百千萬微塵

數十方世界無量世界彌勒是名菩薩知住  
 持義彌勒何者菩薩知資生義所謂我爲衆  
 生說種種資生所受用故彌勒何者是菩薩  
 知顛倒義彌勒即彼取受用於無常義中生  
 常相顛倒心相顛倒見相顛倒於苦中生樂  
 相顛倒不淨中生淨相顛倒於無我中生我  
 相顛倒心相顛倒見相顛倒彌勒是名菩薩  
 知顛倒義彌勒何者是菩薩知非顛倒義彌  
 勒即遠離彼四顛倒是名菩薩知非顛倒義  
 彌勒何者是菩薩知染相義彌勒於三界中

有三種染相所謂煩惱染業染生染彌勒是名菩薩善知染義彌勒云何菩薩知淨義彌勒即遠離彼三種染修行菩提分法彌勒是名菩薩知淨義彌勒此十種義攝取一切義應知彌勒是名菩薩如實知義相復次彌勒若菩薩知五種法彼菩薩名善知義何等爲五一者可知境界二者可知義三者知法四者依知得證果五者如實受彼法彌勒何者是可知法彌勒一切境界所謂五陰內諸入外諸入等是名知境界彌勒何者是可知義

彌勒無量種觀如實知彼法所謂世諦第一義諦功德法過咎法因緣法三世法生法住法滅法病等諸法苦集等法真如法實際法法界法略法廣法一向差別說問答法置答法秘密法直說法彌勒如是等可知義應知彌勒何者是知法彌勒能生彼知功三三十七品所謂四念處乃至八聖道彌勒是名知法彌勒何者是菩薩依知得證法所謂滅貪瞋癡煩惱遠離貪瞋癡煩惱得四沙門果所謂我說聲聞如來世間出世間一切功德彼諸功

德如實證知彌勒是名菩薩依智證果法彌勒何者是菩薩如實受彼法彌勒即彼所證法知解脫受解脫復為一切眾廣說示現開發彌勒此五法攝取一切義應知復次彌勒菩薩知四種觀名如實知義何等為四所謂知心生義知受用義知隨心義知染淨義彌勒菩薩畢竟得四種義亦名攝取一切義應知復次菩薩如實知三種法名為如實知義何等為三所謂字義義界義彌勒何者字義所謂名身等應知彌勒是名字義彌勒

何者義義彌勒義義有十種何等為十所謂實相知相遠離相證相修行相即彼實相等種種差別相依止所依止相應相即彼知相等障礙相隨順法相不知過咎相知利益相彌勒是名菩薩知義義相彌勒何者是菩薩知界義相彌勒界義相有五種所謂世界眾生界法界可化界可化方便界彌勒此五種界攝取一切義應知爾時彌勒菩薩白佛言世尊所言聞慧思慧修慧奢摩他毗婆舍那三種修行義此三種慧云何差別佛言彌勒

劫三

十一

聞慧修行者依止名字如聞不稱意非現前  
解脫隨順解脫彌勒是名聞慧修行義彌勒  
思慧修行義者彌勒思慧亦依名字惟如聞  
不如是隨順心非現前解脫而轉轉隨順解  
脫非現證解脫彌勒是名思慧修行義彌勒  
修慧修行義者彌勒菩薩依名字不依名字  
如依如聞不依如聞隨順心隨智可知法三  
昧境界像現前轉轉隨順解脫增長解脫彌  
勒是名修慧修行義彌勒是名三慧異相義  
彌勒菩薩言世尊菩薩修行奢摩他毗婆舍

那何等為智何等為見佛言彌勒我應說彼  
無量智見相以略言之於差別法相中奢摩  
他毗婆舍那般若是名為智彌勒觀諸法無  
差別相是名為見彌勒菩薩言世尊菩薩修  
行奢摩他毗婆舍那以何等心觀何法相佛  
言彌勒真如觀心修行法相義相亦不見名  
亦不見名體相亦不見彼名字因相如是句  
字一切義應知乃至不見十八界自體相亦  
不見彼因相修行奢摩他毗婆舍那是名修  
行奢摩他毗婆舍那義應知彌勒菩薩言世

尊菩薩修行真如義相亦修行彼相不佛言  
彌勒真如形相無相可見若無相者云何修  
行彌勒菩薩修行真如相者降伏一切法一  
切法義相而彼諸法不能降伏真如義相彌  
勒菩薩言世尊世尊常說器不清淨鏡不清  
淨諸水等濁不見面相清淨器等能見面相  
如是世尊不修行如實心者不能見諸一切  
法相修行者見世尊依何等心觀何等真如  
觀說如是義佛言彌勒我依三種觀說如是  
義何等為三所謂聞慧思慧修慧三種觀心

初三

十二

能識真如彌勒我依如是義說彌勒菩薩言  
世尊菩薩如是解諸法義修行諸法相幾法  
相難修行以何等法何等觀觀彼難修行佛  
言彌勒有十種難修行相依十八空觀彼難  
修行相何等為十彌勒觀法義相種種名字  
相依一切法空斷彼難修行相彌勒取如實  
義相受用所謂生相滅相住相異相相應行  
相依相空無始空斷彼難修行相彌勒取能  
取義相所謂依身相依我相依內空依不見  
空斷彼難修行相彌勒取可取相所謂資生

相依外空斷彼難修行相彌勒取受用義男  
 女相種種資生所謂內外清淨相依內外空  
 自性空斷彼難修行相彌勒取住持義有無  
 量相依大空斷彼難修行相彌勒取無色修  
 行相內寂靜解脫相依有為空斷彼難修行  
 相彌勒取真如相義所謂我空法空惟是心  
 第一義相依本空無物空自體空無體自體  
 空第一義空斷彼難修行相彌勒取清淨真  
 如無為相義離諸相無異相依無為空不異  
 空斷彼難修行相彌勒取彼無為空無異空

勅三

十三

為斷彼空相對治無為空無異空依空空斷  
 彼二空彌勒菩薩言世尊菩薩如是修行十  
 種相於何等縛相而得解脫佛言彌勒修行  
 三昧境界見形像相染縛煩惱中而得解脫  
 即觀彼鏡像不取境界相是名斷彼難修行  
 相彌勒當知差別而言是諸空等對十種相  
 非一一空不能對治斷十種相彌勒譬如無  
 明不能生生乃至老死染煩惱等但依本言  
 無明緣行生依近因緣故如是說彌勒此義  
 如是應知彌勒菩薩言世尊何者是略空相

菩薩知彼略空相不失一切空相離諸一切  
憍慢空相爾時世尊告彌勒菩薩言善哉彌  
勒善哉彌勒汝今乃能問佛此義彌勒汝能  
爲於諸菩薩等不失常相故如是問善哉是  
問何以故彌勒若菩薩不知空相則失一切  
大乘法相彌勒汝今諦聽我爲汝說略相空  
義彌勒於他力相第一義相一切法中無染  
淨相彼虛妄分別相常離彼相不見有相是  
名大乘中說略相空彌勒菩薩言世尊奢摩  
他毗婆舍那攝幾種三昧佛言彌勒我說種

種三昧所謂聲聞菩薩如來三昧攝取彼諸  
一切三昧應知彌勒菩薩言世尊奢摩他毗  
婆舍那能成何等法因佛言彌勒能成清淨  
戒因能成聞慧思慧見因彌勒菩薩言世尊  
彼清淨戒聞慧思慧因成何等果佛言彌勒能  
成心清淨果智慧清淨果復次彌勒能成一  
切世間出世間善法一切聲聞菩薩諸佛奢  
摩他毗婆舍那果應知彌勒菩薩言世尊奢  
摩他毗婆舍那作何等業佛言彌勒遠離二  
種縛何者爲二所謂遠離相縛遠離煩惱縛

彌勒是名奢摩他毗婆舍那業彌勒菩薩言  
 世尊佛說五種障幾種障奢摩他幾種障毗  
 婆舍那幾種向二障佛言彌勒惜身資生此  
 二種障奢摩他彌勒聖人所說一切善法得  
 聞不喜此障毗婆舍那彌勒喜憤鬧處得少  
 為足此二障奢摩他毗婆舍那應知彌勒喜  
 憤鬧處不能發修行法得少為足不能畢竟  
 得究竟處彌勒菩薩言世尊如來說五種蓋  
 幾是奢摩他障幾是毗婆舍那障幾是向二  
 障佛言彌勒掉悔是奢摩他障睡眠疑是毗婆

舍那障欲瞋二種是向二障彌勒菩薩言世  
 尊云何善清淨奢摩他道佛言彌勒善伏睡  
 眠如是名為善能清淨奢摩他道彌勒菩薩  
 言世尊云何善清淨毗婆舍那道佛言彌勒  
 若能善斷掉悔二蓋如是則名善能清淨毗  
 婆舍那道彌勒菩薩言世尊菩薩修行奢摩  
 他毗婆舍那行有幾種法能知心散亂不名  
 相應佛言彌勒菩薩知五種法所謂正念散  
 亂外心散亂內心散亂相散亂煩惱散亂彌  
 勒若菩薩捨正念大乘相應相墮念聲聞辟

劫三

十五

支佛相應相彌勒是名菩薩正念散亂彌勒。若菩薩著外五欲樂憤鬧處著諸覺觀隨順煩惱相念是名外心散亂彌勒。若菩薩爲睡不眠心著三昧及餘三昧三摩婆提染於所染彌勒是名內心散亂彌勒。若菩薩依外相內身三昧境界相思惟是名相散亂彌勒。若菩薩依內心思惟因緣生覺觀煩惱如是心是我彌勒是名煩惱散亂心彌勒。菩薩言世尊奢摩他毗婆舍那從初菩薩地乃至如來地對治何等法佛言彌勒奢摩他毗婆舍那

於初地中對治惡道業生煩惱染第二地中對治微細過失第三地中對治欲得善法過第四地中對治愛三摩跋提心過第五地中對治世間涅槃一向現前不一向現前過第六地中對治諸相行過第七地中對治微細相行過第八地中對治無相行自然行過第九地中對治一切種說法不得自在過第十地中對治未得滿足法身過彌勒第十一地中對治微細極微細智障彌勒菩薩斷彼一切障已得無障礙一切智處成就所求法得

清淨法身彌勒菩薩言世尊云何菩薩修行  
 奢摩他毗婆舍那得阿耨多羅三藐三菩提  
 佛言彌勒菩薩修行奢摩他毗婆舍那依七  
 種真如為本如聞思法入於定心即念彼法  
 如聞思慧善思惟內心差別觀彼真如菩薩  
 觀彼真如之法尚捨微細修行之心何況麤  
 法彌勒何者是微細修行心相所謂生心識  
 受心識染淨識內外及彼二修行利益一切  
 眾生真如智苦集滅道有為無為常無常苦  
 集不異自性業有為相一切人無我法無我

如三

十六

相如是等法修行捨心彌勒菩薩如是發心  
 修行如是多修行刹那刹那離一切蓋得清  
 淨心得清淨心已入七種真如內身證彼七  
 種覺相應知彌勒是名菩薩摩訶薩善得見  
 道菩薩得彼見道智已名定聚菩薩生在佛  
 家受用初地利益歡喜是菩薩先已修行奢  
 摩他毗婆舍那道於此始得事究竟觀是菩  
 薩復於上上地中修行念彼二種觀故離諸  
 微細相彌勒譬如有人巧以細捐出彼麤捐  
 彌勒菩薩修行亦復如是觀內心相離彼一



永樂北藏

深密解脫經

第四三册

深密解脫經卷第四

効四

元魏天竺三藏法師 菩提留支 譯

彌勒菩薩問品第九之餘

彌勒菩薩言世尊云何菩薩摩訶薩修菩薩行現得菩薩諸勝妙果佛言彌勒若菩薩如

効四

實能知六種法者是人能得菩薩妙果何等六種所謂善知心生善知心住善知心起善知法來善知善法增長善知巧方便彌勒云何菩薩善知心生彌勒若菩薩知十六種心生所謂不覺不知不動器世間識譬如阿陀

那識取種種相觀識譬如一時取色等可取境界無分別意識知内外色一念間入無量三昧見無量佛國土見無量諸佛彌勒少相觀相應識譬如欲界相相應識彌勒大相觀相應識譬如色界相相應識彌勒無量相觀相應識譬如一切虛空一切識相相應識彌勒細相觀相應識譬如少相相應識彌勒徧相觀相應識譬如非想非非想相相應識彌勒極細相觀相應識譬如出世間相相應識彌勒苦相觀相應識譬如惡道識彌勒雜相

受相觀相應識譬如欲界識彌勒喜相觀相  
 應識譬如初禪二禪識彌勒樂相觀相應識  
 譬如第三禪識彌勒不苦不樂相觀相應識  
 譬如第四禪乃至非想非非想識彌勒染相  
 觀相應識譬如染煩惱隨順煩惱識彌勒善  
 法相觀相應識譬如修行信等相應識彌勒  
 無記相觀相應識譬如遠離彼二法識彌勒  
 是名菩薩知諸法生彌勒云何菩薩如實知  
 諸法住彌勒若菩薩如實能知惟是識體是  
 名菩薩知諸法住彌勒云何菩薩善知諸法

起彌勒若菩薩如實能知二種相煩惱縛若  
 知彼已作是思惟應捨此法彌勒菩薩如是  
 名善知諸法起彌勒云何菩薩善知法來彌  
 勒若菩薩善知彼煩惱對治心增長知諸法  
 增長已名菩薩善知我法增長彌勒云何  
 菩薩善知諸法下彌勒若菩薩知彼對治法  
 煩惱染相心下損善知諸法損彌勒是名菩  
 薩善知諸法下彌勒云何菩薩善知巧方便  
 彌勒若菩薩觀察解脫勝處一切入彌勒是  
 名菩薩善知巧方便彌勒菩薩摩訶薩善知

如是修行菩薩行者能得菩薩最勝妙果彌勒過去一切菩薩亦如是未來一切菩薩亦如是現在一切菩薩亦如是修行菩薩行得菩薩妙果彌勒菩薩言世尊如來常說無餘涅槃界中一切受滅盡無餘世尊何者是彼受相而言一切受相滅佛言彌勒略說二種受滅所謂見身受相滅受彼果境界受相滅彌勒身受相滅者有四種受應知何等四種所謂依止色受相依止非色受相成就果受相不成就果受相彌勒成就果受相者謂現

前受相不成就果受相者謂未來世因受彼果報境界受相亦有四種所謂住持受相資生受相受用受相對受相彌勒有餘涅槃界中非成就受相果明觸受相受是故依彼對一切受相未滅以有餘受相彌勒成就果相受相一切種彼二受相滅但有明觸受相受無餘涅槃界中彼受亦滅以無餘涅槃界中更無明觸相是故我說無餘涅槃界中滅一切受相爾時世尊告彌勒菩薩摩訶薩言善哉善哉彌勒汝依如實修行故問滿足清淨

菩薩行相彌勒汝於如實修行法中善學具  
 足是故問我如實行法彌勒我已善說菩薩  
 滿足清淨修行法應知彌勒過去諸佛亦如  
 是說未來諸佛亦如是說現在諸佛亦如是  
 說過去未來現在一切諸善男子亦如是問  
 是故一切諸善男子善女人等應當至心行  
 菩薩行爾時世尊而說偈言  
 此說法中行 若人不放逸 智人正思惟  
 能得無上道 若人取法相 欲得彼法體  
 彼離如實行 空地不相應 見為眾生怯

利眾生勇猛 得無染著相 一切出世間  
 為求欲說法 彼人還得法 彼得無價寶  
 乞求行世間 解脫諸戲論 精進行堅固  
 為利益眾生 修行此實行  
 爾時彌勒菩薩摩訶薩白佛言世尊此深密  
 解脫經中當何名此法門云何奉持佛言彌  
 勒此法門名為如實修行了義修多羅汝當  
 奉持說是如實修行了義修多羅時六千眾  
 生發阿耨多羅三藐三菩提心三千聲聞遠  
 塵離垢得法眼淨十萬五千聲聞離諸漏得

心解脫七萬五千菩薩得大乘如實行觀成就

聖者觀世自在菩薩問品第十

爾時聖者觀世自在菩薩摩訶薩白佛言世尊世尊為諸菩薩說十地差別所謂歡喜地

第四

離垢地光明地焰地難勝地現前地遠行地不動地善慧地法雲地第十一佛地世尊有幾種清淨攝此諸地有幾種分佛言觀世自在有四種清淨十一分攝此諸地應知觀世自在增上清淨攝初地增上戒清淨攝二地

增上心清淨攝三地增上慧清淨攝四地乃至上上勝妙從四地乃至佛地觀世自在是名四種清淨攝諸地應知觀世自在何者十分攝諸地義觀世自在從菩薩起信行地修行十種信心能善思惟菩薩乘彼信行地行過彼信地入於定聚滿足彼分觀世自在彼諸菩薩雖滿彼分於微細行中而猶不能如實修行彼諸菩薩不滿彼分為滿足故修行進求得滿彼分雖滿彼分而猶不能如實滿足世間三昧三摩跋提及未滿足聞持陀

羅尼彼諸菩薩不滿彼分爲滿足故修行進  
求得滿彼分雖滿彼分如菩提分而猶不能  
如實修行心不能捨三昧愛法彼諸菩薩不  
滿彼分爲滿足故修行進求得滿彼分雖滿  
彼分而猶不能如實觀察一切諸諦亦不能  
捨方便所攝修<sup>劫四</sup>菩提分世間涅槃一向現前  
一向不現前彼諸菩薩不滿彼分爲滿足故  
修行進求得滿彼分雖滿彼分而猶不能如  
實知諸世間生死現見修行及無相正念不  
能多修彼諸菩薩不滿彼分爲滿足故修行

進求得滿彼分雖滿彼分而猶不能如實而  
知無間不斷無相正念不能多修彼諸菩薩  
不滿彼分爲滿足故修行進求得滿彼分雖  
滿彼分而猶不能捨無相行自然而行無相  
行中不得自在彼諸菩薩彼分不滿爲滿足  
故修行進求得滿彼分雖滿彼分而猶不能  
於彼種種名字諸相無礙而說一切諸法及  
不能得說法自在彼諸菩薩不滿彼分爲滿  
足故修行進求得滿彼分雖滿彼分而不能  
得滿足法身及不能得受樂法身彼諸菩薩

不滿彼分爲滿足故修行進求得滿彼分雖  
滿彼分而不能得於諸一切境界相中無障  
無礙智慧具足彼諸菩薩不滿彼分爲滿足  
故修行進求得滿彼分得滿彼分已名爲滿  
足一切菩提分得滿菩提菩薩名之爲佛觀  
世自在如是十一種分攝諸地應知觀世自  
在菩薩白佛言世尊世尊何故菩薩初地說  
名歡喜地乃至佛地說名佛地佛言觀世自  
在菩薩初離生死得出世間大利清淨勝妙  
歡喜踊躍是故初地名歡喜地遠離一切微

細破戒障故是故第二名離垢地依無量智  
光明照曜照諸三昧及聞持陀羅尼而得自  
在能作光明是故第三名光明地智火焰熾  
燒菩提分煩惱習垢是故第四名爲焰地即  
彼菩提分方便修行難勝得勝是故第五名  
難勝地正念思惟諸有爲行現前證知諸法  
無相是故第六名現前地無間無斷無相正  
念遠入妙行近清淨地是故第七名遠行地  
無有諸相自然修行相不能動是故第八名  
不動地說一切法一切種智無礙自在得廣

大智無不降伏是故第九名善慧地衆生煩惱過患之身如虛空等如來法身猶如大雲覆衆生界說法示現是故第十名法雲地離一切無明微細習氣離一切境界智障習氣無障無礙於一切法中而得自在是故第十一名爲佛地觀世自在菩薩白佛言世尊世尊此諸地有幾種無明幾種障對佛言觀世自在有二十二種無明十一種對觀世自在於初地中執著人我法我無明惡道煩惱染相無明迷沒彼二是故名對於二地中微細

過無明種種業道無明迷沒彼二是故名對於三地中求欲法無明滿足聞持陀羅尼無明迷沒彼二是故名對於四地中愛三摩跋提無明愛法無明迷沒彼二是故名對於五地中於世間正念思惟非一向背世間非一向現世間無明於涅槃正念思惟非一向背涅槃非一向趣涅槃無明迷沒彼二是故名對於六地中不如實知有爲行現前無明多集諸相無明迷沒彼二是故名對於七地中微細相行無明一向思惟方便無明迷沒彼

如四

七

二是故名對於八地中無自然無相無明諸相不得自在無明迷沒彼二是故名對於九地中無量說法無量名向上上樂說智慧陀羅尼無明樂說辯才自在無明迷沒彼二是故名對於十地中大通無明入微細密無明迷沒彼二是故名對於佛地中於一切境界極微細無明他障無明迷沒彼二是故名對觀世自在是名二十二種無明十一種對說諸地差別觀世自在而阿耨多羅三藐三菩提此諸法不相應觀世自在菩薩言希有世

尊阿耨多羅三藐三菩提大利大果彼諸菩薩破大無明迷沒羅網亦滅一切虛妄對稠林得阿耨多羅三藐三菩提觀世自在菩薩白佛言世尊世尊說此諸地有幾種殊勝佛言觀世自在有八種清淨所謂直心清淨慈清淨悲清淨波羅蜜清淨見諸佛供養清淨教化衆生清淨生清淨力清淨觀世自在於初地中直心清淨乃至力清淨復有上上地乃至佛地直心清淨力清淨彼清淨極清淨增上清淨應知觀世自在除佛地生清淨所

謂初地諸功德彼諸地功德乃至上上地彼  
初地功德平等無差別而地地有勝功德應  
知觀世自在菩薩白佛言世尊世尊何故說  
一切諸生中菩薩摩訶薩生為最勝佛言觀  
世自在有四種法所謂善集諸善根清淨故  
得內心方便故起大慈悲救諸一切諸眾生  
故自無染故能令一切眾生無染觀世自在  
菩薩白佛言世尊世尊何故說諸菩薩能發  
一切妙願勝願殊勝力願佛言觀世自在有  
四種法菩薩能如實知涅槃妙樂故速得阿

耨多羅三藐三菩提復有捨彼速得菩提勝  
妙樂行不為報恩而發大心為利眾生於六  
道中長夜受諸種種苦惱觀世自在是故我  
說諸菩薩摩訶薩妙願勝願殊勝力願觀世  
自在菩薩白佛言世尊世尊菩薩摩訶薩有  
幾種學事佛告觀世自在菩薩言觀世自在  
菩薩學事有六種何等為六所謂檀波羅蜜  
尸羅波羅蜜羼提波羅蜜毗梨耶波羅蜜禪  
波羅蜜般若波羅蜜觀世自在菩薩白佛言  
世尊此六種學幾增上戒學幾增上心學幾

增上慧學佛言觀世自在初三學檀波羅蜜尸波羅蜜羸提波羅蜜增上戒學禪波羅蜜增上心學般若波羅蜜增上慧學毗梨耶波羅蜜徧諸波羅蜜觀世自在三種增上攝六種學事應知觀世自在菩薩白佛言世尊此六種修行幾功德莊嚴功四幾智慧莊嚴佛言觀世自在增上戒學功德莊嚴增上慧學智慧莊嚴精進波羅蜜禪波羅蜜徧諸波羅蜜應知觀世自在菩薩白佛言世尊世尊菩薩云何學此諸學佛言觀世自在有五種觀法學

此諸學何等爲五所謂依諸波羅蜜說法依菩薩藏初至心信次有十種法行如實修行聞思修慧智故護諸菩提心故親近善知識故不休息修行一切諸善根故觀世自在是名菩薩學諸學事應知觀世自在菩薩白佛言世尊世尊此諸學事何故說六種數佛言觀世自在有二種義何等爲二所謂攝取一切衆生故對治諸障故觀世自在三種學攝取衆生利益故三種學對治諸障故觀世自在菩薩修行檀波羅蜜資生利益攝取衆生

菩薩修行尸波羅蜜不惱不害以無畏施攝  
取衆生菩薩修行羸提波羅蜜無報怨心攝  
取衆生觀世自在以此三學攝取衆生觀世  
自在菩薩修行毗梨耶波羅蜜動諸煩惱殺  
害諸使修行分中不爲一切煩惱所動菩薩  
修行禪波羅蜜縛諸煩惱菩薩修行般若波  
羅蜜斷一切使觀世自在是三種波羅蜜對  
治所治煩惱故觀世自在菩薩白佛言世尊  
世尊何故說餘四波羅蜜但有四數佛言觀  
世自在爲成就彼六波羅蜜伴故說餘四波

羅蜜觀世自在菩薩三波羅蜜攝取衆生攝  
事方便攝取衆生置善法中是故我說方便  
波羅蜜與三波羅蜜爲伴觀世自在菩薩現  
身依多煩惱而亂其心不能修行如實之法  
而復信樂少行少法微薄直心不能攝取內  
心正定聞菩薩藏如聞而觀不能入定而不  
能起出世間智但修少分功德智慧莊嚴之  
相依彼少分智慧莊嚴爲薄未來煩惱作願  
是菩薩願波羅蜜願未來世諸煩惱薄能成  
精進波羅蜜是故我說願波羅蜜與毗梨耶

波羅蜜爲伴觀世自在菩薩親近善知識故  
聽聞正法如實思惟而能隨順如實修行轉  
彼薄心增長善力於彼真如法界之中得增  
上力是菩薩力波羅蜜得內心定是故我說  
力波羅蜜與禪波羅蜜爲伴觀世自在菩薩  
依於菩薩藏故聞慧正觀修禪波羅蜜是菩  
薩智波羅蜜依智波羅蜜能生出世般若波  
羅蜜是故我說智波羅蜜與般若波羅蜜爲  
伴觀世自在菩薩白佛言世尊世尊何故說  
六波羅蜜如是次第佛言觀世自在依前後

上上轉勝故觀世自在菩薩遠離受用欲心  
受持淨戒受持淨戒已能忍諸惡能忍諸惡  
已能成精進能成精進已能入諸禪能入諸  
禪已能得出世間智慧觀世自在是故我說  
六波羅蜜如是次第應知觀世自在菩薩白  
佛言世尊世尊說諸波羅蜜各有幾種差別  
佛言觀世自在諸波羅蜜各有三種差別觀  
世自在檀波羅蜜有三種所謂法施財施無  
畏施尸羅波羅蜜有三種所謂離諸惡行戒  
修諸善行戒利益衆生戒羸提波羅蜜有三

初四

十一

種所謂忍諸惡忍忍諸苦忍忍諸法忍毗梨耶波羅蜜有三種所謂發起精進修行善法精進利益衆生精進禪波羅蜜有三種所謂無分別寂靜極寂靜對治煩惱受樂行禪起諸功德禪起利益衆生禪般若波羅蜜有三種所謂觀世諦般若觀第一義諦般若觀利益衆生般若觀世自在是名諸法波羅蜜各有三種差別應知觀世自在菩薩白佛言世尊以何義故說諸波羅蜜名波羅蜜佛言觀世自在有五種義說名波羅蜜所謂不著不

希望無過不分別迴向觀世自在菩薩不著者所謂不著諸波羅蜜相違事不希望者於諸波羅蜜受用果報報恩中無求心無過者遠離諸波羅蜜無方便雜染法不分別者諸波羅蜜中不如所聞執著自相迴向者諸波羅蜜所作所集迴取大菩提果故觀世自在是故我說名波羅蜜觀世自在菩薩白佛言世尊諸波羅蜜相違事有幾種佛言觀世自在波羅蜜相違事有六種何等爲六所謂樂於五欲資生自在我受樂見功德利益自在

故隨身口意行自在故於他輕惱心不堪忍  
故著自身樂故專念世間散亂行故於世間  
中見聞覺知名字分別爲勝功德故觀世自  
在是名諸波羅蜜相違事觀世自在菩薩白  
佛言世尊世尊何者是諸波羅蜜果報佛言  
觀世自在諸波羅蜜果報有六種應知何等  
爲六所謂得富財故趣善道故無怨敵故不  
壞多喜樂故常爲衆生主故不害自身大威  
德力故觀世自在是名諸波羅蜜六種果報  
觀世自在菩薩白佛言世尊何者是諸波羅

蜜雜染法佛言觀世自在諸波羅蜜有四種  
不如法行名爲雜染何等爲四所謂無慈心  
行故不正念行故不斷惡行故不至心行故  
觀世自在菩薩白佛言世尊何者是不正思  
惟佛言觀世自在所謂修行諸波羅蜜離餘  
波羅蜜行是名不正思惟觀世自在菩薩白  
佛言世尊何者是菩薩無方便修行佛言觀  
世自在若菩薩修波羅蜜行攝取衆生但施  
飲食資生等樂以爲滿足而不能令離不善  
處置於善處是名菩薩無方便修行何以故

觀世自在非施飲食如是等樂名爲利益觀  
世自在譬如糞穢若多若少無人能令生香  
美氣觀世自在如是一切有爲行苦一切衆  
生自性諸苦飲食資生攝取衆生不可爲樂  
觀世自在若置衆生在於第一上善法中究  
竟樂處名爲攝取與大利益觀世自在菩薩  
白佛言世尊世尊此諸波羅蜜有幾種清淨  
佛言觀世自在我不說離五種清淨更有清  
淨觀世自在而我依此五種清淨略廣說諸  
波羅蜜清淨之相觀世自在何者是略說諸

初四

十三

波羅蜜清淨之相觀世自在一切波羅蜜有  
七種清淨何等爲七所謂菩薩離我說法復  
於他邊不求智慧故此見諸法不生執著知  
一切法能取大菩提故不生異意異疑故不  
自讚歎不毀他人故不欺不憍慢不放逸故  
得少善法不生滿足心故得此諸法於他人  
邊不生嫉妬慳吝心故觀世自在是名略說  
諸波羅蜜七種清淨應知觀世自在我復廣  
說諸波羅蜜清淨之相依彼七種說諸波羅  
蜜清淨何等七種觀世自在我說諸菩薩摩

訶薩檀波羅蜜七種清淨如實修行何等爲  
七所謂依悲心施清淨施清淨即戒清淨見  
清淨心清淨口清淨智清淨意清淨是名檀  
波羅蜜七種清淨應知觀世自在如是戒波  
羅蜜有七種清淨何等爲七所謂菩薩摩訶  
薩於菩薩受持戒如實知一切戒如常能知  
離諸過法彼法恒持堅固戒至心戒常隨順  
戒於諸學中如實持戒觀世自在是名戒波  
羅蜜七種清淨應知觀世自在如是羸提波  
羅蜜有七種清淨何等爲七所謂菩薩自信

業報於諸一切不饒益事心不瞋恨若罵若  
瞋若打一切惡事來加其身不生報心不懷  
結恨若彼求悔應時即受不令他惱不求他  
求不爲有畏不爲飲食而行忍辱於受他恩  
不忘還報觀世自在是名忍辱波羅蜜七種  
清淨應知觀世自在毗梨耶波羅蜜有七種  
清淨何等爲七所謂菩薩如實知精進平等  
故不爲精進自高下他故身體安住如山不  
動故常勤精進故心不怯弱故所行堅固故  
於諸善法起精進心不休息故觀世自在是

第十四

十四

名毗梨耶波羅蜜七種清淨應知觀世自在  
 禪波羅蜜有七種清淨何等為七所謂菩薩  
 善決定知諸相三昧禪波羅蜜滿足三昧禪  
 波羅蜜如實知三分三昧禪波羅蜜如實知  
 隨順三昧法禪波羅蜜不依止三昧禪波羅  
 蜜善練諸業所作善三昧禪波羅蜜觀菩薩  
 藏無量三昧禪波羅蜜觀世自在是名禪波  
 羅蜜七種清淨應知觀世自在般若波羅蜜  
 有七種清淨何等為七所謂離有無謗中道  
 般若依般若力如實能知三解脫義謂空無

相無願如實能知三種分別他力第一義諦  
 如實能知三種名相生相第一義相自體如  
 實能知世諦五明處如實能知第一義諦於  
 七種真如不分別不戲論一味多修行無量  
 差別觀法奢摩他毗婆舍那隨聞如實修行  
 成就觀世自在是名般若波羅蜜七種清淨  
 應知觀世自在菩薩白佛言世尊世尊此五  
 種觀一一觀有何等業佛言觀世自在此五  
 種觀各有五業應知何等為五所謂菩薩不  
 著現報常至心行諸波羅蜜不放逸故不希

初四

十五

望報恩攝取未來不放逸故無諸過失能善  
滿足善清淨善白淨修諸波羅蜜故依無分  
別巧方便速滿諸波羅蜜故依迴向力一切  
生處得善果報依彼如實修行諸波羅蜜不  
盡乃至得阿耨多羅三藐三菩提故觀世自  
在是名菩薩諸波羅蜜差別業應知觀世自  
在菩薩白佛言世尊世尊此諸波羅蜜何者  
最勝佛言觀世自在所謂不吝資財不著果  
報迴向大菩提觀世自在是名最勝應知觀  
世自在言世尊何者是無染法佛言所謂無

諸過無分別是名無染法應知觀世自在菩  
薩白佛言世尊何者為明妙佛言所謂緣滅  
諸法應知觀世自在菩薩白佛言世尊世尊  
何者是菩薩不動地佛言觀世自在菩薩入  
初歡喜地具足大力不退諸法是名菩薩不  
動地應知觀世自在言世尊何等法是菩薩  
清淨法佛言所謂滿足十地乃至滿足佛地  
應知觀世自在菩薩白佛言世尊世尊何故  
菩薩諸波羅蜜不盡愛樂果報亦不盡佛言  
所謂處相因生妙樂果應知

永樂北藏

深密解脫經

第四三册

深密解脫經卷第四

四

六

深密解脫經卷第五

効五

元魏天竺三藏法師 菩提留支 譯

聖者觀世自在菩薩問品第十之餘

聖者觀世自在菩薩白佛言世尊世尊何故諸菩薩心不多樂諸波羅蜜果報而多樂諸

効五

波羅蜜行佛言觀世自在有五種法何等爲五所謂樂於增上歡喜樂故攝取自利利他故樂未來世樂報恩故不染諸法故不失彼法故應知觀世自在菩薩白佛言世尊世尊此諸波羅蜜各有幾種勝妙之力佛言觀世

自在此諸波羅蜜各有四種妙力應知何等爲四一謂菩薩修行諸波羅蜜遠離慳嫉心遠離破戒心遠離瞋心遠離懈怠心遠離散亂心遠離諸見心故能成就阿耨多羅三藐三菩提諸功德故現身攝取自身他身故於未來世能得廣大無盡愛果報故觀世自在菩薩白佛言世尊世尊此諸波羅蜜何等爲因何等爲果何等爲力佛言觀世自在大悲爲因愛樂攝取衆生爲果能滿足菩提爲力應知觀世自在菩薩白佛言世尊世尊若諸

菩薩一切資財隨心所用不可窮盡菩薩復有大悲愍心何故世間貧窮衆生受種種苦佛言觀世自在此諸衆生自業罪過菩薩大悲常欲與諸一切衆生無盡富樂常懷憐愍堅固不動觀世自在若諸衆生無自罪障世間無有貧窮衆生觀世自在譬如一切諸餓鬼等爲渴逼惱徃見一切諸河大海悉皆乾竭此非諸河大海過咎是諸餓鬼自罪業報諸菩薩等施諸衆生一切資財如彼大海無有過咎而諸衆生受貧窮苦如彼餓鬼自作

惡業有如是報非菩薩過觀世自在菩薩白佛言世尊世尊菩薩何等波羅蜜取諸法無體相佛言觀世自在般若波羅蜜取諸法無自體相觀世自在言世尊若菩薩般若波羅蜜取諸法無體相者世尊何故般若波羅蜜不取諸法有體相佛言觀世自在我說取無體相無體相者汝當莫著言語何以故無體相法離諸一切名字言語內身證法不可以名字章句說我依名字說言般若取諸法無體相觀世自在菩薩白佛言世尊如世尊說

勿五

二

諸波羅蜜隨近波羅蜜大波羅蜜世尊何者是波羅蜜何者是近波羅蜜何者大波羅蜜佛言觀世自在菩薩從無量劫來修行布施等諸波羅蜜畢竟能得一切善法而彼菩薩具煩惱性現行於心而彼煩惱不能染菩薩而菩薩能降伏煩惱謂信行地於軟中信心而修諸行是名波羅蜜觀世自在復有無量劫時畢竟修行增上善法心行煩惱而彼菩薩能伏煩惱煩惱不能降伏菩薩謂未入初地應知觀世自在是名近波羅蜜復次觀世

自在菩薩於無量劫畢竟修行上上善法彼菩薩一切煩惱不行於心所謂初地至八地第十地觀世自在是名大波羅蜜應知觀世自在菩薩白佛言世尊世尊此諸地中有幾種使煩惱佛言觀世自在有三種使煩惱何等為三所謂劫五害伴使煩惱三薄使煩惱微細使煩惱觀世自在何者害伴使煩惱謂從初地乃至第五地不俱生煩惱俱生煩惱伴彼菩薩害伴使煩惱不行於心是故我說害伴使煩惱觀世自在何者是薄使煩惱謂六地七

地中微細無明使煩惱菩薩修行薄彼無明煩惱是名薄使煩惱觀世自在何者是微細極微細煩惱謂八地上上地一切無明使煩惱不行於心惟有一切境界微細障觀世自在是名三種使煩惱應知觀世自在菩薩白佛言世尊世尊說菩薩斷一切過得斷諸使世尊菩薩斷幾種過名斷諸使佛言觀世自在菩薩斷三種過能斷諸使何等爲三所謂皮膚及骨觀世自在初斷皮障離第一過次斷膚障離第二過次斷骨障離第三過我說

一切使盡是名佛地應知觀世自在菩薩白佛言世尊世尊幾阿僧祇劫斷彼諸過佛言觀世自在三大阿僧祇劫無量時無量月無量半月無量夜無量晝日無量念無量刹那無量無昧多無量羅婆劫斷彼諸過應知觀世自在菩薩白佛言世尊此諸地中諸菩薩有何等煩惱相何等功德而我應知願爲我說佛言觀世自在無有染相生諸煩惱有無量功德生諸煩惱應知何以故菩薩於初地中自性證於一切法界善能覺知一切法界

是故菩薩如實能知生諸煩惱非為不知是故於自身中無有染相以不能生諸苦過故無有諸過為衆生界斷因果故菩薩無量功德生諸煩惱觀世自在菩薩白佛言希有世尊是大菩提能大利益以諸菩薩生諸煩惱降伏一切聲聞緣覺一切善根何況諸餘無量功德觀世自在菩薩白佛言世尊如世尊說聲聞乘大乘是為一乘世尊何意作如是說佛言觀世自在我聲聞乘中說種種法所謂五陰內六入外六入如是等我說彼法界

一味而被聲聞不能覺知是故我說有種種乘觀世自在如有衆生聞說如是分別執著彼人不知一乘之體取種種乘而證彼法異異而取遞共諍論我意如是應知爾時世尊而說偈言

種種諸法相 我依一理說 生於下劣解  
 我說名二乘 如聞聲分別 而不知彼義  
 故諸乘相違 憍慢衆生諍 知諸地妙相  
 及諸願生處 此勝相對治 我說是大乘  
 爾時觀世自在菩薩白佛言世尊深密解脫

修多羅中此法門者名為何等云何奉持佛  
 告觀世自在菩薩言觀世自在在此修多羅名  
 地波羅蜜了義法門汝今應當如是受持說  
 此地波羅蜜了義經時七萬五千菩薩得大  
 乘光明三昧

切五

五

聖者文殊師利法王子菩薩問品第十一

爾時聖者文殊師利法王子菩薩摩訶薩依  
 如來所作住持業差別白佛言世尊世尊如  
 來法身有何等相佛告文殊師利如實修行  
 十地波羅蜜轉身成就得妙法身是名諸佛

如來法身相應知文殊師利彼佛法身有二  
 種相不可思議何等為二所謂法身離諸戲  
 論離諸一切有為行相而諸衆生執著戲論  
 有為行相文殊師利白佛言世尊聲聞緣覺  
 轉身所得為是法身為非法身佛告文殊師  
 利非法身也文殊師利白佛言世尊若非法  
 身是何等身佛言文殊師利名解脫身非法  
 身也依解脫身聲聞緣覺諸佛如來其身平  
 等而佛法身差別殊勝法身勝者勝彼一切  
 聲聞緣覺無量無邊阿僧祇功德奇特殊勝

不可爲譬爲分別顛倒對治彼人說如來生  
如經文殊師利白佛言世尊諸佛生世有何  
等相佛告文殊師利化身生相隨世界相一  
切種一切功德莊嚴住持相相應即是化身  
生世間相應知文殊師利而佛如來法身不  
生文殊師利白佛言世尊我云何知化身所  
作現方便相佛告文殊師利一切佛國土三  
千大千世界中大勢力家及福田家一時退  
入胎住胎出胎生已增長受五欲樂而行大  
捨出家苦行證菩提轉法輪入涅槃文殊師

利是應化身所作方便示現應知文殊師利  
白佛言世尊世尊依如來法身住持力幾種  
語爲衆生說法如來說法依可化衆生未熟  
者令熟已熟者令得解脫佛言文殊師利如  
來有三語何等爲三謂說修多羅毗尼摩得  
勒伽文殊師利是爲三種應知文殊師利言  
世尊何等修多羅何等毗尼何等摩得勒伽  
佛言文殊師利我所說少事法是名修多羅  
少事法者謂四種事九種事二十九種事文  
殊師利所言四種事者謂聞事歸依事學事

第五

六

菩提事是名四種事文殊師利所言九種事者謂施設事衆生向受用事向生事向生住事向染淨事向種種事能說事可說事眷屬事是名九種事文殊師利所言二十九事者謂依煩惱對染諸行事隨順事何者是隨順事謂隨順彼人相未來世生因事故依法相未來行因事依淨分觀事即彼處修行事令心住事現身受樂法行事過一切苦觀行事即如實知彼事彼事有三種依顛倒住持故依衆生相外觀邪行住持相故內心無憍慢

住持故修行住事現證事修行事作向堅固事向觀彼九種事觀察遠離不遠離方便事向散亂事不散亂不失事修行無障礙事修行利益事向堅固事向彼實證事具足得涅槃事如來善說毗尼法世間正見出諸外道初五一切勝事不修行彼法退事何以故文殊師利若於如來善說毗尼法中不能修行令善法退非邪見過文殊師利言世尊何者是毗尼相文殊師利毗尼相者我為聲聞及諸菩薩說波羅提木叉及波羅提木叉相應法是

名毗尼事文殊師利言世尊菩薩有幾種法  
攝波羅提木又佛言文殊師利菩薩有七種  
法攝波羅提木又何等爲七所謂菩薩知說  
受持法知說波羅夷事知說過事知說過事  
體知說無過事體知說起過事知說受持法  
失事文殊師利是名菩薩七種法攝波羅提  
木又應知文殊師利言世尊何者是摩得勒  
伽文殊師利我所說十一種相示現了義經  
是名摩得勒伽文殊師利言世尊何等是摩  
得勒伽十一種相佛言文殊師利所謂世諦

相第一義諦相觀菩提分法相彼法相自體  
相彼法果相受彼法說相彼法障相彼法隨  
順相彼法過失相彼法利益相文殊師利言  
世尊何者是世諦相文殊師利世諦相者有  
三種何等爲三說人相說分別體相觀諸法  
思惟作種種業相應知文殊師利言世尊何  
者第一義諦相文殊師利第一義諦相有七  
種如七種真如中說文殊師利言世尊何者  
是觀菩提分法相文殊師利觀菩提分法相  
者所謂觀一切種事應知文殊師利言世尊

何者是彼法相文殊師利彼法相者如八種  
觀中應知文殊師利言世尊何等八種觀文  
殊師利所謂依實諦住諦過失功德通相形  
相相應相廣略說相文殊師利實諦相者所  
謂真如住諦相者所謂人相分別相差別體  
一句答相隨問如五分別答相置答相密事示現  
相過失相者所謂我說諸法染過功德相者  
所謂我說一切淨法無量利益相通相者有  
六種應知何等六種謂真實義通得通說通  
離二邊通不可思議通意通形相者所謂三

世三有爲相四種因緣相應相者有四種應  
知何等爲四謂相待相應能作所作相應生  
相應法體相應相待相應者謂何等因何等  
緣能生有爲行名字等用是名相待相應能  
作所作相應者何等因何等緣能得法能生  
法能生法已能成辦業是名能作所作相應  
生相應者謂何等因何等緣知法說法示法  
能成能正覺知是名生相應法體相應者略  
說有二種何等爲二謂一者淨二者不淨文  
殊師利淨有五種相不淨有七種相文殊師

利何者淨五種相一者彼現前見相二者依  
彼現前見相三者自相譬喻相四者成就相  
五者說清淨阿含相文殊師利何者是彼現  
前見相謂一切有爲行無常一切有爲行苦  
一切法無我世間現前見法如是等是名彼  
現前見相應知文殊師利何者是依彼現前  
見相所謂一切諸有爲行一相故不失未來  
善不善業依彼麤法現見故依種種業見種  
種衆生現見故依善不善業受苦受樂現見  
故於現見法中譬喻如是等彼依止現見相

如五

九

應知文殊師利自相譬喻相者所謂內外一  
切世間現見譬喻因緣如是等名爲自相因  
緣譬喻應知如是依彼現見相依止彼現見  
相譬喻相一向成就彼事名爲成就相應知  
文殊師利何者是說清淨阿含相所謂一切  
智人說彼寂靜涅槃之相如是等名清淨阿  
含相應知文殊師利汝應如是深觀察五種  
清淨相深觀察已知清淨知清淨已如是修  
行文殊師利白佛言世尊有幾種法知一切  
智人相佛言文殊師利有五種法知一切智

人相何等為五有人出世於諸一切天人世  
 間名一切智有人畢竟成就三十二大人之  
 相得十力法能斷一切衆生疑具四無畏降  
 伏一切諸魔怨敵說法更無能作礙難於說  
 法中善說八聖菩提道分現證成就四沙門  
 果文殊師利如是依生依相斷疑降伏無人  
 能難現見沙門五種法現前是名一切智人  
 相應知文殊師利此依生成相應現見相應  
 量相應比智相應聖人說法相應知五種相  
 是名清淨相應知文殊師利何者是七種不

清淨相所謂彼相似見相彼不相似見相有  
 一切相似見相一切不相似見相自譬喻異  
 相不成相說法不清淨阿舍相文殊師利何  
 者是有一切相似見相謂一切法依意識知  
 同相如是等名為一切法相似同見相文殊  
 師利何者是一切法不相似見相謂法相體  
 相業法因果異相一一相異相畢竟彼彼相  
 待異相如是等是名一切不相似不同見相  
 文殊師利何者是自譬喻異相謂彼相似見  
 相譬喻中有一切不相似不同相為成彼事

物五

十

一向不成是故我說彼不成相文殊師利自彼不相似見相譬喻中有一切相似同相為成彼事一向不成是故我說不成相若不成相者彼法不清淨若法不清淨者不應修行是故我說不清淨阿含相以自性不清淨應知文殊師利何者是法體所謂如來出世及不出世法住法體法界是名法界體相應知文殊師利言世尊何者是略廣相文殊師利所謂略說一句彼一句上上句差別無量句乃至說應至處是名略說應知文殊師利言

世尊何者是得相文殊師利謂取諸法見觀菩提分法我說菩提分法四念處等是名彼法自體相共世間出世間遠離染相彼法果起世間出世間功德是名彼得相文殊師利即彼法依解脫智受用應知廣為人說示現十一是名彼法隨順示現相文殊師利即彼修行菩提分法離道相傳染法是名向障法應知文殊師利為彼法多生增長是名隨順彼法相文殊師利障諸法是名過相文殊師利隨順彼法功德是名利益相應知爾時文殊師

利菩薩白佛言世尊惟願世尊爲諸菩薩更重略說修多羅毗尼摩得勒伽義不共一切外道二乘陀羅尼相諸佛如來說甚深法諸菩薩得甚深意得已能入一切佛法佛告文殊師利汝今諦聽我當爲汝略說陀羅尼義諸菩薩等聞我法已能得我意得我意已入於我法文殊師利何者略說陀羅尼義所謂我說一切染法一切淨法彼一切法不覺相無作相無分別相無我相如是如是法我說不覺無作無分別無我相以一切無覺無我

相是故染法非先是染後時得淨諸淨法者亦非先淨後得名染愚癡凡夫依虛妄染身執著我法計自體相依因邪見而言有我所謂我能見我聞能嗅得味能觸我能知我能食我染我淨生如是等諸邪見行若人如是如實能知離煩惱身彼人能得離諸煩惱斷諸戲論畢竟清淨得無爲身無有一切諸有爲行文殊師利是名略說陀羅尼義應知爾時世尊而說偈言  
諸法本無染 後時不清淨 染及於清淨

是諸法無我 染身見有我 生於我所想  
 我染及清淨 我見及以養 若能如是知  
 彼人離煩惱 能得無染身 是故名無爲  
 文殊師利菩薩白佛言世尊世尊如來心生  
 有何等相願爲我說佛告文殊師利如來非  
 心意識得名而無諸行心生得名依應化身  
 說名爲生文殊師利言世尊若法身離於諸  
 行云何離作心行而能生心佛言文殊師利  
 依本方便般若修行自然而生文殊師利譬  
 如睡眠無心覺起而能覺起文殊師利如入

初五

十二

滅盡定而無起心依本作心自然而起文殊  
 師利如睡滅定二無起心依本而起如是如  
 來心生依本般若方便修行成就應知文殊  
 師利菩薩白佛言世尊世尊說如來應化所  
 作化身爲是有心爲是無心佛言文殊師利  
 得言有心得言無心何以故以自心不得自  
 在故言無心假他力故言有心文殊師利白  
 佛言世尊如世尊說如來行處如來境界此  
 二種法有何差別佛言文殊師利言如來行  
 處者一切諸佛功德平等不可思議無量功

德莊嚴清淨佛之國土是名諸佛如來行處  
 文殊師利言如來境界者有五種何等為五  
 所謂衆生界世界法界可化衆生界方便界  
 文殊師利如來行處如來境界如是差別應  
 知文殊師利菩薩白佛言世尊世尊如來得  
 大菩提轉大法輪入大涅槃此三種相云何  
 差別我云何知佛告文殊師利言文殊師利  
 無有二相不證菩提非不證菩提不轉法輪  
 非不轉法輪非入大涅槃非不入大涅槃文  
 殊師利言世尊我解世尊所說之義何以故

如五

十三

如來法身本來常清淨故應化身示現故文  
 殊師利言世尊衆生見彼應化之身聞應化  
 身觸應化身供養讚歎應化之身得諸功德  
 於何身得佛言文殊師利以能正念如來身  
 故以應化身依如來法身住持力得文殊師  
 利白佛言世尊世尊等無心無作無行何義  
 故如來法身為諸衆生出大光明及出無量  
 應化鏡像而諸聲聞辟支佛等解脫之身無  
 如是相佛言文殊師利等無心無作譬如日  
 月摩尼珠等為諸衆生出大光明及種種物

而水瑠璃玻瓈珠等無心無作不出一切光明等物何以故依大衆生住持力故依諸衆生增上業故文殊師利譬如善巧鍊治珠寶能出影像餘不善者不出光明文殊師利諸佛如來亦復如是依無量法正觀修行方便般若作諸善業集諸善根依佛法身方便智慧出諸光明及出無量應化色像聲聞緣覺解脫之身不能修習一切善根故不能出文殊師利菩薩白佛言世尊世尊說依諸佛菩薩住持力故一切衆生成就世間功德之身

所謂生於刹利婆羅門大長者家欲界色界無色界一切處一切身一切功德果報成就皆依諸佛及諸菩薩住持力得世尊何意作如是說佛言文殊師利如來住持之力及菩薩力隨說何等道初五何等修行若有人能依於彼道如實修行十四彼人一切生處一切身一切世間果報成就文殊師利若人不能信於彼道又復不能如實修行謗我法誣我法而於我身生惡瞋心彼人命終一切生處常得一切下劣惡身受惡果報文殊師利依於此義

汝今應知非但成就上妙勝身及勝果報依  
 佛如來住持力得下劣惡身及惡果報亦依  
 如來住持力得又殊師利白佛言世尊世尊  
 不淨國土中何法易得何法難得世尊淨佛  
 國土中何法易得何法難得佛告文殊師利  
 言文殊師利不淨國土中有八事易得二事  
 難得何等為八所謂外道易得受苦眾生易  
 得生下姓家勢力敗壞易得惡行眾生易得  
 破戒眾生易得入惡道眾生易得發下品心  
 小乘眾生易得發菩提心菩薩墮劣心易得

文殊師利何者二事難得高心修行菩薩難  
 得諸佛如來出世難得文殊師利淨佛國土  
 中八事難得二事易得應如是知爾時文殊  
 師利法王子菩薩白佛言世尊此深密解脫  
 修多羅中此法門當名何等云何奉持佛告  
 文殊師利法王子菩薩言文殊師利此法門  
 名說諸佛如來住持力了義經文殊師利如  
 來所說了義修多羅其義如是汝當奉持說  
 此如來住持力了義經時七萬五千菩薩得  
 滿足法身文殊師利法王子菩薩摩訶薩及

初五

十五

諸一切天人阿脩羅大衆歡喜奉行

深密解脫經卷第五

音釋

波羅提木叉

梵語也

此解脫也

摩得勒伽

此梵語也

母以生智慧故  
也勒歷德切  
鍛鍊也治直吏切  
理也攻也

鼻許救切  
搯氣曰歟

鍊治

鍊連切

永樂北藏

深密解脫經

第四三册